

IOSEPHI <sup>344A162</sup>  
VALDANI  
ACADEMICI  
BRIX.


*De philosophiæ moralis usu in Aristotelis libros  
de moribus ad Nicomachum  
præfatio.*

AD ACADEMICOS  
BRIXIANOS.

*Vna cum definitionibus quibusdam ex eisdem  
libris excerptis.*

Item de Logices usu in Aristotelis topica præfatio.

Ac alia præfatio,  
De Mathematicarum usu in Euclidis  
Elementa.



BRIXIAE Apud Thomam Bozolan. 1567.

# JOSEPH VALLADAR ACADEMICI

BRIT.

De philosophia morali et in Aristotelis libros  
... ..

...

ACADEMICOS

BRITANNIAE

... ..  
... ..

... ..

...

De ... ..

...



... ..

2 46

# DE PHILOSOPHIAE

## MORALIS VSV,

### IN ARISTOTELIS LIBROS DE MORIBVS AD NICOMACHVM

#### PRAEFATIO

#### AD ACADEMICOS

#### BRIXIANOS.



*VM* mecum ipse reputo, *Amplissimi Viri*, tum oblatis mihi a uobis negotij magnitudinem, tum mearum uirium imbecillitatē, non possum non uereri, ne longe maius quā ut ferre ualeam hoc onus futurum sit. Quod .n. maius aut grauius munus esse posset, quā nobilissimam illam philosophiae partem, quae est de moribus ab *Aristotele* conscripta, in hac florentissima *Academia* interpretari? Id quidem opus, ut est pulcherri-  
mum, ac grauissimum, ita eum deposcit interpretem, qui non uulgari quadam, sed eximia & singulari eruditione praeditus, summi illius philosophi sensa acute indagare, & doctissime explicare queat: haec uero uestra *Academia* uiris quidem non solum nobilissimis, sed etiam doctissimis orna-

ta, atque referta, nihil omnino nisi exquisitum ingenio, atque elaboratum industria postulat. Ego autem optare quidem hæc possum, sperare uero, non solum propter eruditionis, ac ingenij tenuitatem, sed etiam propter ualeitudinis imbecillitatem non audeo: iam enim amplius biennium grauissimo morbo afflictatus, atque ad interitum prope deductus, uix iam reuiuiscere ac respirare incipio; ad studiorum uero labores perferendos minime me ualere sentio. Quamobrem diu multumq; anceps fui, hanc honestissimam mihi a uobis oblatam pro uinciam susciperem ne, an recusarem; ac ut uere fatear, eam statueram, ut uiribus meis imparem, omnino recusare, sed cum uos, Amplissimi Viri, quos ego, uti debeo, summa obseruantia colo, tanto studio id a me contenderitis, ut nihil prorsus, quod excogitari posset, a uobis pretermisum esse uideatur, nullumq; meæ apud uos quanuis iustissimæ excusationi locum reliqueritis, nolui uoluntati uestræ diutius repugnare, nolui uiris illis clarissimis, ac sapientissimis, Vincentio Madio Philosopho, & Jacobo Chiciolæ Iurisconsulto, & Equiti, qui me obnixè uestro nomine rogarunt, non obtemperare, illudque existimaui, si mihi forte ad hoc munus obeundum uires non sufficerent, id me saltem consecuturum, ut meam erga uos propensam uoluntatem apertissime declararem. Spero autem Deum opt. max. quæ est illius immensa benignitas, id mihi opis allaturum, quo aliqua sal-

tem ex parte muneris meo satisfaciam: ac confido fore, ut uos, pro uestra in me humanitate, eo sitis contenti, quod ab exiguis uiribus meis proficisci poterit; illud existimantes, quicquid in me est, id totum summo animi cādore uobis esse addictum, & consecratum. Quod autem ad grati erga uos animi mei significationem attinet, magnitudo beneficii uestri mihi quidem facultatem aufert, quo minus pares uobis gratias agam, uoluntatem non aufert; quæ cū perpetuā nominis uestri memoria apud me est duratura. Neque uero illud tentare uolui, quod me nullo orationis genere assequi posse considerem, neque mihi licere putauī hoc tempore, quo ad aliā progredi institutum est, nam de moralis philosophiæ usu hac præfatione uerba apud uos facere constitui: Ac ne multis morer, ab eo, qui huius prope diuinæ disciplinæ autor, atque inuentor fuit, initium summam.

Cum ob alia multa Socrates a scriptoribus celebratur, tum uero ob id, quod philosophiam primus e cælo ad terrās deuocarit. cum enim antea de rebus naturalibus ac cælestibus philosophi potissimum disputarent, existimauit uir ille sapientissimus, multo esse utilius hominum generi, uitā atq; mores informare, quā aut rerum naturalium causas, aut siderum cursus, magnitudines, atque interualla perscrutari, itaque philosophiam a curiosa illa rerum inuestigatione ad ciuilem uitę utilitatem traduxit. quam deinde Plato uir diui

2  
nus, præceptoris sui uestigijs insisterens, mirum in modum auxit, atque exornauit. postremo uero Aristoteles ita ordinate, ita perfecte persecutus est, ut si iudicio naturali standum sit, nihil omnino ad eius perfectionem desiderari posse uideatur.

Quamobrem illud a uobis rectissime, ac prudentissime statutum est, Amplissimi Viri, ut in Academia uestra, cui Deus opt. max. in perpetuum faueat, moralis philosophia ab Aristotele tradita explicetur: quod uestrum consilium tamen si intelligo me non posse pro dignitate laudare, (id enim non interpretis indiferti, sed eloquentissimi oratoris munus esset) facile tamen, quàm rectum, quàm utile, quàm præclarum sit, ijs opinor fore perspicuū, qui philosophiæ moralis usum probe perspexerint. qua quidem de re si hoc in loco nonnulla dixero, rē fortasse nec uobis iniucūdā, nec a munere meo alienam aggrediar. ita enim & sapientissimum consilium uestrum satis laudari, & uirtutis amatores ad huius disciplinæ studiū accendi, atque inflammari posse existimo.

Vt igitur moralis philosophiæ usum exponamus, primo quidem nobis ostendendum uidetur, quidnam ipsa sit, deinde quibus de rebus agat, postremo uero ad quem finem nos perducatur. atque ut constet apertius quidnam sit, duas eius definitiones afferemus: hinc enim eius etiam usus magna ex parte constabit. Hæc igitur philosophia nihil aliud uidetur esse, quàm ars siue disciplina niuen-

di: & quoniam in eo laborat, ut recte; beneq; uiuamus, utq; ad felicitatem, quæ est summum humanæ uitæ bonum, nos perducatur; idcirco rectissime dicitur esse ars bene, beateq; uiuendi: ex quo intelligi potest, quantum hæc disciplina cæteris omnibus, quanuis præclaris & illustribus antecellat. ut enim nobiliores tantum percenseamus, Grammatica dicitur esse ars recte loquendi, recteq; scribendi; Poetica condendi carmina, & actiones humanas imitandi; Rhetorica ars persuadendi; docendi & disputandi Logica. at. quanto præstantius est bene, ac beate uiuere, quàm ex Grammaticæ præceptis loqui, quàm carmina conficere, quàm persuadere; quàm docere aut disputare? id sane tam apertum mihi uidetur, ut apud uiros prudentes nullam omnino probationem requirat. Neque solum his artibus præstat hæc philosophia, quæ in excolenda oratione uersantur, sed illis etiam, quibus res ipsæ subiectæ sunt. Nam Geometria est ars metiendi, Arithmetica supputandi, canendi Musica, Architectura ædificandi. sed multo melius esse bene, ac beate uiuere, quàm metiri, aut supputare, aut canere, aut ædificare, qui ignoret arbitror esse neminem: quamobrem in re minime dubia parum necessaria probatione non utar. Sed & præstantissimas illas doctrinas consideremus, quæ in magno sunt apud homines honore; summumque dignitatis locum sibi uendicant: nimirum Astro nomiam; scientiam naturalem, quæ Physica dici-



342  
tur, & ea superiorem diuinam, quam primam di-  
cunt philosophiam, Iurisprudentiam, & Medici-  
nam. Astronomia quidem est scientia motuum  
cælestium corporum; Physica rerum naturalium;  
prima philosophia diuinarum; Iurisprudentia est  
facultas ciuiles causas iudicandi ac defendendi;  
ars curandi morbos Medicina. Sed ut ab hac po-  
strema conuerso ordine incipiamus, si animus præ-  
stat corpori, qui male animum afficiunt morbi  
multo sunt corporis morbis deteriores, ac proinde  
moralis philosophia, quæ morbos animi depellit,  
medicinæ, quæ corporis morbos profligat, longe  
præstabit. Neque minus Iurisprudentiæ antecel-  
let: si enim interna bona externis præstant, et alie-  
nis propria, quis non intelligit multo satius esse  
prauas animi sui cupiditates coercere, moresq; ad  
rationis normam componere, ac uitam sic institue-  
re, ut nihil in ea iure culpari aut reprehendi queat,  
quàm in litibus defendendis aut iudicandis occu-  
pari? Huic disciplinæ Astronomia quoque &  
scientia naturalis haud inuite opinor cedent. Præ-  
clarum quidem est cælorum numerum, figuram,  
situm, ac motum cognoscere. & quomodo aliud  
ab ortu ad occasum, aliud contra ab occasu ad or-  
tum, aliudq; a septentrione ad austrum motu quo-  
dam reciproco moneatur: præclarum est etiã stel-  
larum figuras, magnitudines, situs, ortus, & occa-  
sus, naturas ac vires cognoscere: præclarissimum  
uero siderum, quæ dicuntur errantia, cum tamen



constantissima sint, motum contemplari, quibus  
temporum spatijs, quibus orbibus, & quibus po-  
lis, unumquodq; conuertatur; & quomodo sol tan-  
quam planetarum princeps, & moderator omnes  
suo motu regat, & temperet; sitq; inter illos ita  
positus, ut tres infra, totidemq; supra ipsum sint;  
semperq; inter Venerem et Mercurium tanquam  
eius comites medius incedat; suoq; motu uaria ef-  
ficiat dierum et noctium incrementa, uariamque  
partium anni temperationem, ad frugum prouen-  
tum, uitamq; animalium aptissimam. quo insuper  
modo sol quidem interdum, luna obiecta, lumine  
destitui uideatur, luna uero, obiecta terra, lumi-  
ne priuetur; et ex uario solis aspectu uarias illas,  
atq; admirabiles suscipiat luminis accretiones, ac  
diminutiones; aliaq; præterea multa, quæ in hac  
nobilissima scientia pertractantur. Neq; minus  
præclarum est ea, de quibus agit naturalis scien-  
tia, contemplari; ueluti prima illa rerum princi-  
pia, materiam, formam, & priuationem; naturam  
deinde, quatuor causas, atque motum; mox conti-  
nuum, infinitum, locum, uacuum, & tempus; ua-  
riasq; motus species atq; affectiones, primi-  
tus, ac primi motoris naturam, atq; præstantiam.  
his adde, ut paucis multa ac propemodum infini-  
ta comprehendamus, cælestia corpora, quatuor ele-  
menta, rerum generationem, atq; interitum, ac-  
cretionem, diminutionem, alterationem, atq; mi-  
stionem, mutuamq; inter elementa actionem, ac

perfectionem; & eorum, quæ in sublimi fiunt, ac  
meteora dicuntur, rationes et causas, mistorumq;  
corporum varias affectiones: Animæ deinde na-  
turam, ac vires, ipsiusq; mentis humanæ præstan-  
tiam: Animalium præterea partes, species, atq;  
naturas. quarum quidem rerum cognitio etsi præ-  
stantissima est, ac humanam mentem summa dele-  
ctatione, singulariq; ornamento afficit, tamen si  
uerum fateri uolumus, longe sane præstantius est  
animum uirtutibus excolere, atque exornare, quàm  
in earum rerum perscrutatione uersari. qui enim  
est ea scientia destitutus, tametsi in magna igno-  
ratione, quasi in tenebricosa quadam caligine, uer-  
satur, non ob id tamen cæteris hominibus multum  
obesse, nec qui est ea præditus, multum prodesse so-  
let: contra uero & qui est uirtutibus ornatus, tot  
quidem affert hominibus utilitates, ut inter mor-  
tales terrestris quidam Deus iure possit existima-  
ri, & qui uitiorum sordibus est inquinatus, tot ac  
tantorum sæpenumero malorum est auctor, ut nul-  
la maior inter homines calamitas, nulla maior pe-  
stis possit existere. Sed iam primam quoq; siue di-  
uinam philosophiam cum morali cõferamus. Quis  
autem non miretur, si supremæ quoq; philosophiæ  
moralem disciplinam audiat anteferri? cum &  
ab Aristotele traditum sit, & ab omnibus philo-  
sophis receptum, primam philosophiam omnium  
disciplinarum esse præstantissimam, atque om-  
nibus tanquam reginam quandam præesse. idq;

optima sanè ratione , cum enim ex rebus subiectis suam dignitatem discipline consequantur , eam , quæ de rebus diuinis agit , ceteris omnibus , quæ de rebus agunt naturalibus , aut humanis præstare necesse est . quamobrem Aristoteles , in sexto de moribus libro , absurdam esse dicit eius sententiam , qui civilem scientiam omnium optimam esse putet , nisi forte rerum omnium , quæ in mundo sunt , homo sit res una præstantissima ; sed alia sunt homine multo diuiniora , ut ea quæ omnibus maxime sunt in conspectu , ex quibus hic mundus coagmentatus est . Hæc ille . Verumtamen tam magna nobis uidetur philosophiæ moralis dignitas , atque præstantia , ut quanuis rei subiectæ ratione habita primam philosophiam præstare facile concedamus , tamen si usum atq; utilitatem spectemus , moralem esse præferendam affirmare non dubitemus . cum enim hæc in actione tota uersetur , illa uero in sola contemplatione consistat , multo sane maiorem ex hac , quàm ex illa fructum consequi homines possunt . Ex his itaque cognoscere licet , illud a Socrate factum sapientissime , quòd philosophiam , ut initio dicebamus , e cælo ad terras deuocarit , idest a rerum naturalium , ac cælestium contemplatione ad humanæ uitæ institutionem traduxerit ; qua fortasse ratione ab Apolline græcorum omnium sapientissimus est indicatus . At uero si cum sanctissima Theologia nostra moralem hanc disciplinam

conferre libeat, illam utique maximo interuallo  
antecedere dicemus. primum quidem, quod hæc  
ab hominibus sit inuenta, illa diuinitus reuelata;  
hæc humanis, illa diuinis rationibus nitatur; hæc  
Socratem, uirum quidem optimum, ac sapientissi-  
mum habuerit auctorem, sed illa Iesum Christum,  
Dei filium, tanto quidem socrate præstantiorem,  
quanto est Deus homine maior, infinitum finito  
præstantius. deinde quod Theologia, unà cum diui-  
narum rerum cognitione, morum etiam, ac uirtu-  
tum disciplinam complexa sit, ut esset omni ex  
parte perfecta, atq; omnibus, quod aiunt, nume-  
ris absoluta. sed cum diuersus in utraq; sit do-  
ctrinæ modus, non inutile fuerit philosophiam,  
idest humanas rationes, cum Theologia, idest di-  
uinis rationibus coniungere, ut intelligant homi-  
nes ea, quæ diuinitus de moribus præcipiuntur, hu-  
manis etiam rationibus confirmari, & suaderi.  
quod quidem multi fecerunt uiri grauissimi ac sa-  
pientissimi quos commemorare non est necesse,  
nullus enim fere est, ex ijs, quos in scripturis sa-  
cris interpretâdis excellere uidemus, qui multam  
in morali doctrina operam non posuerit; sed omit-  
tendi tamen non sunt, neque silentio inuoluendi,  
Diuus Thomas, quem Christianæ religionis claris-  
simum lumen appellare possumus, & Eustratius,  
Episcopus Nicenus, uir optimus ac sapiētissimus;  
hi enim in hos Aristotelis libros de moribus doctis-  
simas explanationes conscripserunt, nobisque iudē

carunt, hanc de moribus doctrinam ut magnopere utilem, et cum religione nostra ualde congruentē, ijs etiam, qui in sacris literis uersantur, esse amplectendam.

Haftenus ex prima philosophiæ moralis definitione, quæ ipsam dicit esse artem bene beateq; uiuendi, hanc disciplinam cæteris serè omnibus prestare ostendimus, nunc alteram eius definitionem afferemus. Ea uero ita se habet. Philosophia moralis est mortis meditatio; quod tamen non ita accipiendum est, ut philosophus sibi ipse uelit manum inferre, quemadmodū Cleombrotus olim existimauit; datus est enim nobis animus a Deo, & cum hoc mortali corpore coniunctus, ut quandiu summo illi opifici uideatur, ibi permaneat, ac uirtutis actionibus sese exerceat. quare retinendus est animus in custodia corporis, nec iniussu eius, a quo ille est nobis datus, e uita migrandum est, ne munus humanum assignatum a Deo defugisse uideamur. Sed quoniam modo philosophia moralis est mortis meditatio? cū duplex sic animæ nexus cum corpore, naturalis et uoluntarius, ille quidē, quo corpus ab anima uitam accipit, hic uero, quo anima a corpore subiugata prauis. eius cupiditatibus famulatur; duplex ẽt est animæ a corpore solutio, naturalis, & uoluntaria; illa quidē, cum anima ab hoc fragili, et caduco corpore separatur, hæc uero cum ab iniqua corporis seruitute uindicatur; quæ quidem illa est quæ philosophia moralis me-

dicatur. tunc autem fit, cum animus a vitijis, prauisq; affectibus longe abductus, ceteras cupiditates sicut equos auriga moderatur, & regit. In vitijis quidem sunt iniustitia, intemperantia, auaritia, atq; alia id genus. In prauis affectibus sunt, inuidencia, impudentia, ac maleuolentia, quę quidem res non moderande, sed cum semper turpes ac prauę sint, ex animo penitus sunt euellendę. sed alij præter hos existunt affectus, qui nõ semper, sed tunc solum cum rationi repugnant vitiosi sunt, ac proinde moderatione quidem egent, sed ex animo penitus euelli nec possunt nec debent. cuius quidem generis sunt letitia atq; amor, qui ex præsentis bono ortum habent; cupiditas & fiducia, qui ex futuro; indignatio atq; æmulatio, qui ex alieno; quibus accedunt qui ex malo oriuntur affectus, ægritudo odium atque ira, qui ex præsentis; auersatio ac timor, qui ex futuro; & qui ex alieno misericordia. quemadmodum igitur medicina corporis humores ex æquans naturęq; obediens reddens, sanitatem homini comparat, ita moralis philosophia hos animi affectus ad rationis moderationem deducens, ipsum summa in pace, summaque tranquillitate constituit. quo in statu homo uitam optimam ac laudatissimam uiuit, ac licet in terris degat, felicitatis tamen compos efficitur; neque mortem formidat, ad quam seipsum sanctissima illa meditatione, qua animũ, quo ad eius fieri potest, abducit a corpore, studiose præparat. sed



ubi eius tempus aduenerit, uelut diuicula perfracta cauea, in propriam ac suæ naturæ conuenientem libertatem libenter sese uendicat: cum ceteri omnes, quorum animus est addictus, & obnoxius corpori, mortem summum malum existiment, camq; uehementissime reformident. Quod si animus ita excultus ad Astronomiam aliasq; nobilissimas scientias sese conuertat, earum ope res naturales, ac diuinas contemplabitur, ac ubiq; diuinam potestatem, sapientiam, providentiam, ac bonitatem ita elucere perspiciet, ut his rebus tanquam scalis quibusdam ad auctorem suum ascendens, cum eo coniungi uehementissime cupiat.

Satis iam ex his, quas assignauimus, definitionibus huius philosophiæ usum patere arbitror; sequitur ut quibus de rebus agat exponamus; etenim ex hoc etiam loco eius usus præclarus & maximus elucebit. Agit uero de uirtutibus, quæ cum sint maximum animi nostri decus & ornamentum, summo a nobis studio & cognoscendæ, et quærendæ sunt. De his autem suis quidem locis latius differere oportebit, sed nunc ad earum usum indicandum satis erit nonnulla breuissime attingere. Virtutes igitur illæ sunt, quæ morbos animi depellant, quæ turbidos affectus componunt, ac inanes sollicitudines detrahunt, quæ homines in optima uiuendi ratione constituunt, summisq; honoribus, alijsq; premijs amplissimis exornant. Ex ijs autem aliæ in bono, aliæ in malo uersantur;



8.  
Et quæ in malo, aut in eo quod metum inculcit, ut  
fortitudo, aut in eo quod iram excitat, ut lenitas,  
sive mansuetudo: quæ uero in bono, aut in delecta-  
bili, ut temperantia, aut in utili, ut liberalitas, Et  
magnificètia, aut in honesto, quod duplex cum sit,  
scilicet honor et æqualitas, in honore uersatur ma-  
gnanimitas, Et alia quædam uirtus, quæ ad ipsam  
ita se habet, ut ad magnificentiam liberalitas, cū  
autem nomine careat, honoris studium a nobis di-  
ci potest; in æqualitate uero uersatur Iustitia. atq;  
hæ quidem omnes in rebus uersantur, sed aliæ præ-  
terea sunt, quæ in sermone potissimum consistunt,  
nimirum humanitas, ueritas, Et urbanitas. pru-  
dentia uero in moralium quidem uirtutum nume-  
ro collocanda non est, sed earum tamen omnium  
dux est Et moderatrix. Hic est uirtutum chorus,  
tam sane præstans Et præclarus, ut si a nobis uel  
musarum choro præferatur, musas ipsas, non ægre  
laturas existimem. cum enim animus noster in  
tres ueluti partes a philosophis diuidatur, quas  
quidem Plato non solum uiribus, sed etiam locis,  
in quibus sunt, diuersas esse iudicauit, irascendi  
enim uim in corde, appetendi facultatem in ieco-  
re, mentem in cerebro sitam esse existimauit, has  
omnes animi partes uirtutes exornant, irascendi  
enim facultatem fortitudo ac lenitas moderatur,  
appetendi uero facultatem expoliunt temperan-  
tia, liberalitas, magnanimitas, atq; iustitia. nunc  
enim ad liberalitatem, quidem magnificentiam,  
ad ma

ad magnanimitatem uero honoris studium referimus : mentem autem , quod quidem ad sermonem pertinet, exornant humanitas, ueritas, & urbanitas, quod uero ad rationem, prudentia; cuius tamen uis in alias omnes uirtutes diffunditur. Quo fit ut nulla sit animi pars , quæ ab harum uirtutum aliqua non excolatur , nullaque sit hominis actio, quæ ab ipsis ad rectam rationis normam non dirigatur. Ac prudentia quidem in his omnibus, quæ agenda proponuntur, quid eligendum quidque fugiendum sit ostendit : hæc uerum bonum a simulato, & uerum decus a fucata gloria discernit : hæc hominem nunquam labi aut errare permittit , uirtutibus omnibus sese admiscet, omnibus consilium affert, tantoque est adiumento, ut sine prudentia reliquarum nulla possit consistere . Fortitudo uero splendidissima sane uirtus est , quæ pugnat non pro suis commodis , sed pro salute communi, nec ullis laboribus , ullisque periculis, cuiusmodi sunt ea quæ in bello accidunt, ab instituto deterretur . & quoniam est Reipub. maximo usui atque ornamento, ideo amplissimis honoribus hominem ornatum reddit . hinc enim senatus iudicio , frequenti hominum sermone, oratorum præconio, poetarum carminibus, picturis, statuis, omni que adeo monumentorum genere uirorum fortium gesta celebrantur, atque immortalitati commendantur. Lenitas autem præclara & ipsa uirtus est , quæ iracundiam ita cohibet , ac moderatur , ut extra

rationis limites hominem ab ea rari non permit-  
tat. quod quidem humanæ uitæ maxime interesse  
nemo est, qui non uideat, cum iracundia inimica  
consilio hominem contumeliosum, truculentum, ac  
rabidum reddat, in maximaq; sæpenumero facino-  
ra præcipitem trumat.

Temperantia profecto uirtus est optima, atque  
sanctissima, quæ dum cupiditates reprimit, & a  
turpibus uoluptatibus, quibus nulla est humanæ  
uitæ pestis capitalior, abstinet, & corporis sanita-  
tem custodit, & animi miram efficit pacem, ac  
tranquillitatem; estq; prudentiæ, ac iustitiæ, cæte-  
rarumq; uirtutum origo & fundamentum.

Liberalitas una ex omnibus uirtutibus homi-  
num beneuolentiam maxime conciliat, ac a benefi-  
cijs conferendis beneficentiæ nomen assumit. cu-  
ius tam mira est uis, ut a sapientibus traditum  
sit, non solum pulchrius esse beneficio afficere, quàm  
affici, uerum etiam iucundius. ac nulla fortasse uir-  
tus est, quæ hominem Deo opt. max. magis similẽ  
reddat, quàm beneficentia. cum enim summus ipse  
Deus homine nequaquam indigeret, tot quidem  
ac tanta bona est ei largitus, ut ea uix oratione ex-  
plicari, aut cogitatione comprehendere possint: cor-  
pus primum tam eleganter, tam mirabiliter extru-  
ctum, ut illius fabricam physici contemplantur ad-  
mirari satis non possint: animum deinde tam præ-  
stantem, tot facultatibus ornatum, ad tot artes,  
tot scientias, totq; uirtutes aptum, ut post supre-

mas illas naturas materiæ expertes, beatas ac diuinas, nihil omnino præstâtius aut mirabilius possit inueniri: externa deinde bona, tot quidem ac tanta, ut homo rerum omnium naturalium dominus ac princeps iure possit appellari, cum non solû cætera omnia sint ei subiecta, sed etiam cælestia corpora, tam præstantia tamq; diuina, hominis gratia, & lucere, & conuerti uideantur. Homo igitur patri illi beneficentissimo similis quodammodo reddetur, si de homine quantum potest bene mereatur.

Sed & Magnanimitas præstantissima uirtus est, quæ in illis existit, qui, cum sint magnis rebus digni, magnis etiâ dignos seipsos censent; & quoniam honor bonorum omnium externorû est maximum, ideo magnanimi honoris maxime studiosi sunt, cætera uero externa bona, quæ annis eximia plerisq; , & præclara uideantur, paruipendunt, neq; in rebus secundis lætitia efferuntur, neque in aduersis mærore contrahuntur; sed in omni fortuna quicquid acciderit moderate ferunt. neq; pericula, magna præsertim, deuitat honestatis communisq; utilitatis causa: beneficia libenter conferunt, accipiunt inuite; & cum accipiunt, maiore mensura reddunt, quàm acceperint: magnas res atque præclaras libenter aggrediuntur, & ad exitum constanter perducunt.

Iustitia uero ita est in ciuitate, omniq; hominû conuietui ad res gerendas necessaria, ut ea sublata

omnis humana societas dissoluatur ac dissipetur. Iniustitia nanque (ut Plato inquit) seditiones, inimicitias, contentionesq; parit, iustitia uero concordiam, & amicitiam. maximumq; , ut idem inquit, propositum est iustitiæ premium: Sic enim de iusto uiro existimandum: Seu paupertati, seu morbis, seu quibusuis alijs eorum, quæ mala uidentur, obnoxius sit, huic demum uel uiuenti uel mortuo ad bonum aliquod ista conducere: neque enim a Deo unquam negligitur quicumque iustus esse, uirtutisq; officijs, quatenus homini licet, Deo simili fieri conabitur.

Postrema quoque uirtutum classis, qua humanitas, ueritas, & urbanitas continentur, magnum in conuietui hominum usum habet. ac humanitas quidem inter morositatem, & assentationem est posita, ueritas inter dissimulationem, & uanitatem, urbanitas inter rusticitatem, & scurrilitatē: Sed his de rebus plura hoc in loco dicere non est operæpretiū. Illud uero, quod per magni interest, non omittendum. de his quidem rebus agere moralem philosophiam, non ut in earum cognitione consistamus, sed ut ex earum norma uiuamus. huius enim disciplinæ finis, ut Aristoteles inquit, est actio, non contemplatio: ac, ut inquit Seneca, facere hæc philosophia docet, non dicere; & hoc exigit, ut ad legem suam quisque uiuat, nec orationi uita dissentiat. Quare quemadmodum medicus, quanuis multa perquirat, & contempletur, in ea

tamen contemplatione non consistit, sed inde profectus ad curandos morbos peruenit, quod nisi præstet, ne medicus quidem dicitur, aut existimatur; ita moralis philosophus, quanuis multa de uirtutibus, multa de uita instituenda nouerit, nisi tamen eius disciplinæ, quam profitetur, præcepta uita & moribus exequatur, eo nomine dignus non est existimandus. Sed ne auditoribus quidem satis fuerit huius præcepta disciplinæ percepisse, qui enim ea solum audientes philosophari se arbitrantur, itaque futurum sperant, ut boni sint, non multum ab ægris differunt, qui medicos studiose illi quidē ac diligenter audiunt, sed nihil eorum, quæ ab illis præcipiuntur efficiunt, quemadmodum igitur illis nunquam corpus erit bene constitutum, dum ita curatur, sic nec his animus, dum hoc modo philosophantur. Hic igitur præcipuus est & maximus moralis philosophiæ usus, ut ex uirtutum norma uitam instituamus, ut scilicet fortes simus, mansueti, ac temperati; ut liberales, magnifici, magnanimi, atq; honoris studiosi; ut faciles, ueraces atq; urbani; ut iusti, atque prudentes: sed ad alia insuper multa hæc disciplina cōferre nobis potest, ac uniuerse quidem ad omnes scientias, omnesque disciplinas capeffendas, peculiariter uero ad ciuilem facultatem, quam Politicē græco nomine appellamus, ad oratoriam, & ad poeticam. Ad omnes quidem scientias confert, quoniam anima ab affectibus perturbata neque ad rerum contemplatio-



nem est apta, neque de rebus sincere iudicat prius  
igitur affectus animi componendi sunt, quàm re-  
rum contemplationi uacandum. Ad civilem ue-  
ro facultatem, quoniam nulla melior iuuentutis  
disciplina, quàm hæc de moribus philosophia exco-  
gitari potest: maximam autem in ciuitate disci-  
plinæ iuuentutis curam habendam esse, ex duobus  
clarissimis philosophiæ luminibus, Platone et Ari-  
stotele, cognosci potest. Plato quidem in Dialogo  
de sanctitate sic inquit. Nam in primis iuuenū  
cura suscipienda est, ut quàm optimi fiant, quem-  
admodum bonum agricolorem teneriores primū  
plantas curare decet, ac deinceps alijs providere.  
Aristoteles uero in octauo libro Politices inquit.  
Quod igitur a legis positore maxime attendendum  
sit ad disciplinam iuuentutis, nemo utique dubita-  
bit, nā id quidem neglectum in ciuitatibus affert  
Reip. detrimentum. cum uero unus sit finis ciuita-  
ti toti, perspicuum est oportere disciplinam quoq;  
esse unam & eandem omnium, & huius curam es-  
se publicam, & non priuatam, quemadmodū nunc  
unusquisque liberorum suorum curam habet, pri-  
uatimq; ut ei uidetur, & priuatam disciplinam  
docet; sed oportet publicorum publice exercitatio-  
nem fieri. Hæc quidem ibi: in septimo uerò libro,  
quænam sit hæc disciplina, et exercitatio, his uer-  
bis docet. Quod igitur felicitatis tantum unicui-  
que contingit quantum uirtutis atque prudentiæ,  
& quantum ex harum præceptis agit, confessum



nobis existat, teste Deo fretis dicente, felicem esse atq; beatum non per aliquod externorum, sed per seipsum, quia scilicet talis ipse reuera est, consequens uero est, & ijsdem rationibus consentaneū, ciuitatem quoq; beatam esse, quæ optima sit, & quæ bene agat: fieri autē non potest, ut bene agāt iī, qui bona non agunt, nulla uero bona actio est, neque uiri, neq; ciuitatis, sine uirtute atque prudentia: fortitudo autem & iustitia & prudentia ciuitatis eandem habet uim ac formā ijs, ob quas unusquisque hominum dicitur iustus, & prudens, & temperatus. Hæc Aristoteles. Sed & leges, & consilia, quæ sunt præcipuæ ciuitatis partes, cū morali philosophia maximam habent coniunctionem. Lex enim nihil aliud est, quàm recta constitutio iubens ea quæ facienda sunt, prohibensque contraria, moralis autem philosophia in eo tota est occupata, ut quid agendum, quidq; fugiendum sit, non ex præceptis tantum, sed ex recta etiam ratione nobis ostendat. quamobrem Plato in duodecimo libro de legibus, rectissime inquit, legum conditores, interpretes, & custodes, uirtutum omnium naturam ac uires cognoscere debere, ac alios, qui scire cupiunt, uel punitione & increpatione indigent, docere; quas uires uirtus, quas uirtutum habeat, & hæc significando excellere ceteris. Consultatio pariter quid agendum sit inquirat in his, quorum exitus incertus est, et in quibus nihil est definiti; ad hoc autem uirtutem cogni-

tionem atque usum plurimum conducere quis non  
intelligit? cum nihil prorsus nisi ex uirtutum nor  
ma recte ac laudabiliter agi queat. Quamobrem  
moralis philosophiæ in ciuili facultate usum esse  
maximum perspicuum est. Sed oratoriæ etiam fa  
cultati maximum affert adiumentum. primum  
enim si eloquentia sit a uirtute seiuncta, non ad  
reipublicæ utilitatem, sed ad pestem potius perni  
ciemq; conuertitur. unde illud constat, plurima  
& maxima detrimenta publicis rebus per homi  
nes eloquentissimos fuisse importata. Deinde ea  
quibus oratores utuntur aut ad mores pertinent,  
aut ad affectus, aut ad rationes; ad mores qui  
dem, cum sic habetur oratio, ut fide dignus qui di  
cit uideatur; ad affectus uero, cum oratione in af  
fectum auditores impelluntur; non enim similiter  
iudicium ferimus, cum letamur, & cum dolemus  
cum diligimus, & cum odio habemus; ad rationes  
autem, cum uerum aut uerisimile ex probabili  
bus, quæ in unaquaque re insunt, ostendimus. cum  
igitur his rebus fides fiat, patet hæc tria ad orato  
rem pertinere, primum quidem ratiocinandi facul  
tatem, deinde mores ac uirtutes, postremo & af  
fectus. cum autem ratiocinandi facultas dialecti  
ca sit, mores autem uirtutes & affectus ad mora  
lem philosophiam pertineant, efficitur, ut rhetori  
ca dialecticæ & moralis philosophiæ quasi propa  
go quædam sit. præterea cum tria tractentur ab  
oratore causarum genera, in ijs omnibus moralis

philosophia plurimum potest, in iudiciali enim genere de iusto et iniusto disputatur, in deliberatiuo de utili ac inutili, in demonstratiuo de honesto ac turpi, de his autem omnibus moralis diligenter agit philosophia. Ad poeticam demum magnopere utilis uidetur esse. primum enim poetam optimis moribus excultū esse propterea oportet, quod qui impuri sunt, turpia ac flagitiosa conscribentes, ad libidinem atque improbitatem adolescentum animos facile impellunt, suntque syrenis similes, quæ cantus suauitate sopitos nautas submergebant. quamobrem ipsos ut hominum generi ualde perniciosos a ciuitatibus arcendos esse Plato indicauit. Sed poetæ illi, qui res honestas, præclaras, & sanctas suis carminibus celebrantes, ad uirtutis actiones obeundas homines excitant, summis etiam honoribus digni habendi sunt. Deinde cum in omni poësis genere in uirtutibus, moribus, & affectibus poetæ uersentur, moralem philosophiā, quæ his de rebus agit, ipsis maxime utilem esse manifestum est. Sed, ut ad finem properemus, hæc nobis breuiter attigisse sufficiat.

Ex tribus illis, quæ hac præfatione tractanda proposuimus, cum duo actenus explicata sint, reliquum est ut tertium deinceps persequamur; ad quem scilicet finem moralis philosophia nos perducat. Hic autem est optimus sane ac præstantissimus, nimirum felicitas, quod est bonorum omnium, quæ homini possunt contingere, maximum atque

optatissimum . id uero non est in uoluptate pos-  
tum , ut ineptissimè quidam homines putarunt,  
cum uoluptas sit animi cum brutis animantibus  
communis, felicitas uero hominis propria. quam-  
obrem nec in sanitate, nec in uiribus corporis erit  
posita . sed nec in diuitijs, quæ sunt fortunæ bona,  
nec propter se ; sed ob aliud expetuntur; cum feli-  
citas sit animi bonum, quod propter se, nō ob aliud  
quicquam expetitur . sed nec in rerum cognitione  
ac scientia est hæc felicitas collocanda , eam enim  
hoc in loco quærimus, quæ in actione , non quæ in  
contemplatione consistit . sed nec in honore consti-  
tuenda est , cum honor in externis bonis numere-  
tur , nec sit in eius qui bonoratur potestate , feli-  
citas uero & internum bonum sit , & in hominis  
potestate positum. Est autem felicitas, Aristote-  
lis quidem sententia, functio animi uirtute dire-  
cta optima ac perfectissima, stabilis & constans,  
& externis bonis ornata. estq; hæc felicitas res op-  
tima, pulcherrima, & iucundissima . quæ quidem  
tria in alijs rebus expetendis distincta sunt , ut  
enim in Deliaci templi uestibulo inscriptum erat,  
sanitas optima res est , iustitia pulcherrima , rei  
amatæ consecutio iucundissima ; sed hæc omnia  
sunt in felicitate coniuncta . Quamobrem cum  
tam præclarus sit huius disciplinæ finis, quanta sit  
eius utilitas ex hoc uno, ut cætera omnia iam o-  
mittamus, optime cognosci potest ; non est enim ei  
propositum orare aut canere, metiri aut supputa-

re, mederi aut ædificare, sed homines beatos atque felices efficere. Quisnam per Deos immortales tanti boni spe sibi proposita non excitetur? quis ad tam præclaræ scientiæ studium non commouetur? Neque uero hæc disciplina felicitatē quamdam inanem, aut incertam pollicetur, qualis est ea, quæ in fortunæ bonis consistit, sed firmam & solidam, ab omni fere molestia, omni timore, omniq; perturbatione liberam, atq; immunem, summa uero lætitia, summaque tranquillitate repletam, & cum decore atq; honestate coniunctam. Quæ si uera sunt, ut certe sunt, quidnam erit huius philosophiæ studio iucundius, aut melius? ut enim Cicero inquit, siue oblectatio queritur animi, requiesq; curarum, quæ conferri cum eo studio potest, quod spectat ad bene beateq; uiuendum? siue ratio ac disciplina uirtutis queritur, aut hæc ars est, aut nulla omnino, per quam eam assequamur, nullam dicere maximarum rerum artem esse, cum minimarum sine arte nulla sit, hominum est parum considerate loquentium, atq; in maximis rebus errantium; si autem est aliqua disciplina uirtutis, ubi ea queretur cum ab hoc discendi genere discefferis? Hæc est illa disciplina, a qua mores formantur, optimæ leges emanant, animi perturbationes sedantur, ac summa uitæ tranquillitas proficiscitur. Iure igitur & merito dicere possumus, O uite philosophia dux, o uirtutis indagatrix, expuleriq; uitiorum, quid non modo uos sed omni-

no uita hominum sine te esse potuisset? tu in-  
uentrix legum, tu magistra morum, & discipli-  
næ fuisti, ad te confugimus, a te opem peti-  
mus, tibi nos ut antea magna ex parte, sic  
nunc penitus totosque tradimus: est autem unus  
dies bene & ex præceptis tuis actus peccanti  
immortalitati anteponendus. Sed ut iam finem  
aliquando dicendi faciamus, cum duplex sit fe-  
licitas, altera quidem perfecta, & absoluta,  
quam ex his corporum uinculis tanquam e car-  
cere soluti a Deo opti. maxi. nos consecuturos  
speramus, altera uero, quam in hac uitæ statu  
partim agendo, partim contemplando consequi  
nobis licet; moralis philosophia eam quidem fe-  
licitatem nobis in hac uita præstat, quæ in actio-  
ne consistit, ad alteram uero nos præparat, quæ  
uiris probis uita functis conceditur. quod tamen  
suis ipsa uiribus præstare nequaquam potest, ni-  
si cum sanctissimæ religionis nostræ doctrina con-  
iungatur; hæc enim ut Dei opt. max. instrumen-  
tum, humanarum uirium ac uirtutum imbecil-  
litatem extollens, ad cælum, ubi beati æuo sem-  
piterno fruuntur nos perducit. Quamobrem  
nos ex morali philosophia multo sanè uberiores  
fructum consequi possumus, quàm illi olim po-  
tuerint, qui solo naturali lumine præditi, Chri-  
stianæ ueritatis expertes fuerunt. illi enim om-  
ni suo conatu huius tantum uitæ felicitatem, im-  
fectam sanè, fugacem, & caducam adipisci

*poterant , nobis uero diuino concessu ac beneficio  
datum est , ut non hanc solum , sed alteram etiam  
illam perfectam , stabilem , ac sempiternam in  
caelis consequamur .*

*Habita in Academia Brixiana*

*pridie nonas Ianuarij.*

M D LXV.





## DEFINITIONES

QVAEDAM EX ARISTOTELIS

LIBRIS DE MORI-

BUS.

A D N I C O M A C H V M

EXCERPTAE.



**F**ELICITAS est summum hominis bonum, quod scilicet propter se, non ob aliud quicquam expetitur, ac per se sufficit ad vitam optime degendam, rerum omnium finis, quæ in actione uersantur. aut potius sic.

*Felicitas est actio animæ rationalis, secundum uirtutem optimam, in uita perfecta. libro primo capite septimo.*

*Virtus est habitus, quo homo & bonus est, & suo munere bene fungitur. aut potius sic.*

*Virtus est habitus electiuus in mediocritate positus, quæ ad nos refertur, & recta ratione est definita. Libro secundo capite sexto.*

*Hæ autem definitiones de uirtute morali sunt intelligendæ; cuius species ex Aristotelis sententia undecim sunt: nempe fortitudo, temperantia, liberalitas, magnificentia, magnanimitas, honoris*

Studium, lenitas, humanitas, ueritas, urbanitas,  
& iustitia. Præter has uero aliæ quinque uirtu-  
tes sunt, quæ rationales dici possunt, a multis di-  
cuntur intellectuæ, uidelicet, prudentia, ars, intel-  
ligentia, scientia, atque sapientia. De fortitudi-  
ne & temperantia in tertio libro agit Aristote-  
les, de alijs octo in quarto libro, de iustitia in quin-  
to, ac de rationalibus uirtutibus in sexto libro  
differit.

Quod si quispiam communem morali ac ratio-  
nali uirtutis definitionem quærat, eam dicemus  
esse habitum laudabilem. ex Aristotele in fine  
primi libri.

Fortitudo est uirtus, quæ pro honestate agit, ac  
perfert quæcunque recta iubet ratio, nec honesta  
morte, nec ijs impendentibus, quæ ipsam asserunt,  
deterretur, cuiusmodi sunt ea, quæ in bello accidunt.  
libro tertio capite sexto.

Eius extrema sunt, audacia, ac timiditas. li-  
bro secundo cap. septimo: ac libro tertio capite  
etiam septimo.

Fortitudinis non ueræ quinque modos Aristote-  
les statuit, civilem, quæ fit aut honoris deside-  
rio, aut infamiæ, aut pænæ metu; militarem, quæ  
ex rei bellicæ experientia fit; præterea quæ fit ex  
ira, aut amore, & quæ ex uictoriæ spe, demum  
& quæ ex periculi ignorance. libro tertio ca-  
pite octauo.

Temperantia est uirtus, quæ in uoluptatibus  
ad

ad gustatum et tactum præcipue spectantibus uersatur, & cupiditates communes, & proprias ex recta ratione moderatur. libro tertio cap. 10.  
& 11.

Eius extrema sunt, intemperantia, & sensus priuatio. libro secundo cap. 7. et libro tertio cā. 11

Ad temperantiam nonnulli referunt abstinentiam, sobrietatem, castitatem, & pudicitiam: abstinentiā a cibo dicunt esse, sobrietatem a potu, castitatem a uenere, pudicitiam ab omni alia turpitudine, quæ ad uenerem prouocet.

Liberalitas est uirtus, quæ pecunijs optime utitur, ac honestatis causa tribuit, quibus, quantum, & quando oportet, idque libenter, & iucunde.

Eius extrema sunt, effusio, quæ prodigalitas dicitur, & auaritia. libro quarto cap. primo.

Magnificentia est uirtus, quæ magnos sumptus, rebusque magnis congruentes, facit.

Eius extrema sunt, hinc quidem nimius atque indecorus sumptus, inde uero indecora parsimonia: atque hæc, si latine liceret, paruificentia, illa uanificentia diceretur. libro quarto cap. secundo.

Magnanimitas est uirtus, qua quis magnis se ipsam rebus dignum merito deputat, honore autem maxime; atque in omni fortuna aut secunda aut aduersa se moderatum præbet.

Eius extrema sunt, elatio animi, fixe arrogantia, & demissio animi, quæ pusillanimitas dicitur:

libro quarto capite tertio.

*Videtur autem magnanimitas quasi quoddam uirtutum omnium esse ornamentum, nam & maiores eas amplioresq; facit, & sine illis constare nullo modo potest.*

*Honoris studium est uirtus, qua quis moderate et ex rebus honestis honorem querit.*

*Eius extrema sunt, ambitio, et honoris incuria. libro quarto capite quarto.*

*Est autem honor signum beneficæ existimationis. libro primo rhetorices capite quinto. Alij dicunt esse reuerentiam, quæ alicui exhibetur in uirtutis testimonium.*

*Lenitas seu mansuetudo est uirtus, quæ iram cohibet ac moderatur, nec extra rationis limites ab ea rapi hominem permittit.*

*Eius extrema sunt, iracundia, & lentitudo. libro quarto capite quinto.*

*Humanitas seu affabilitas est uirtus, qua quis cum hominibus ita uersatur, ut eos non offendat, sed sermonum, & morum suauitate delectet.*

*Eius extrema sunt, aſſentatio, & morositas. libro quarto capite sexto.*

*Veritas est uirtus, qua quis tum in oratione, tum in uita, id quod est, profitetur, neque maiora neque minora, quàm quæ insunt, sibi tribuit, ac uendicat.*

*Eius extrema sunt, uanitas, & dissimulatio, siue ironia. libro quarto capite septimo.*

*Hæc autem ueritas ab ea longe diuersa est, quæ oratio, & opinio uera esse dicitur, quæ definitur esse conuenientia rei cum oratione aut opinione.*

*Urbanitas est uirtus, quæ quis concinne, & lepide salibus, & iocis utitur.*

*Eius extrema sunt, scurrilitas, & rusticitas. libro quarto capite octauo.*

*Iustitia alia est uniuersalis, alia particularis, et propria. Iustitia uniuersalis in legum obedientia consistit; & cum leges de omnibus uirtutibus statuunt, ideo dictum est, Iustitia in sese uirtutes continet omnes. libro quinto capite primo.*

*Iustitia uero, quæ proprie dicitur, est uirtus, quæ æqualitatem seruat, in commutando quidem arithmeticam, in distribuendo uero geometricam. libro quinto capite quarto: aut sic.*

*Iustitia est uirtus, quæ quis consulto agit ac distribuit id, quod iustum est, non ita ut sibi plus boni alteri minus, mali contra, sed æquum sibi, & alijs ex proportionem tribuat. libro quinto capite quinto.*

*Iustum est, quod est æquale, & medium inter plus, & minus eo, quod honestum est, in mutuis hominum actionibus. libro quinto capite tertio.*

*Iustum aliud est naturale, aliud legitimum, naturale est, quod ubique eandem habet facultatem, apud eos scilicet qui animo bene affecti sunt.*

*Legitimum est, quod ab initio sic ne an aliter statuatur, nihil refert, sed cum statutum est, mul-*

tum refert . libro quinto capite septimo.

Iustitia quoque inter duo extrema posita est , nempe inter iniuriam facere , & iniuriam pati ; non tamen inter duo uitia , ut aliæ uirtutes morales ; quoniam utrumque eorum extremorum ad iniustitiam pertinet . libro quinto cap. quinto.

In puniendo autem inter seueritatem , & clementiam uidetur esse , quarum altera acerbius punit quàm par sit , altera mitius .

Iniuria est , cum quis sponte , ac iniuste aliquem ledit , præter eius uoluntatem . libro quinto cap. 9.

Quedam autem repente fit , quedam consulto ; propter hanc quidem homo iniustus , & improbus est dicendus , propter illam uero nequaquam . libro quinto capite octauo.

Infortunium est , cum quis inscienter , & inopinato aliquem ledit .

Erratum , cum inscienter quidem , sed non inopinato . libro quinto capite octauo.

Aequitas est quedam iustitia legis emendatrix , qua parte deficit , propterea quòd generaliter posita est . libro quinto capite decimo.

Eius extrema esse uidentur , summum ius , atq; indulgentia .

Sunt etiam quidā affectus inter extrema positi , licet uirtutes non sint ; ut uerecundia inter impudentiam , & uitiosum pudorem ; indignatio inter inuidiam , & maleuolentiam . libro secundo capite septimo ,



*Verecundia est timor infamiae . libro quarto cap. 9. Alij dicunt esse dolorem conceptum ex defectu proprio, in conspectu alterius, quem faciei rubor comitatur.*

*Indignatio est in ijs, qui dolent eorum rebus secundis, qui eis indigni sunt.*

*Invidia seu inuidia est in ijs, qui rebus omnium secundis tristantur.*

*Maleuolentia est in ijs, qui alienis malis letantur . libro secundo capite septimo.*

*Omnis uirtus est cum electione coniuncta ; & omnis electio spontanea est, & consultationem sequitur.*

*Spontaneum illud est, quod neque ui, neq; ignoratione fit . libro tertio capite primo.*

*Inuitum illud est, quod aut ui, aut ignoratione fit, atque ubi agnoscitur dolore ac pœnitentia afficit ; Ignoratio autem non rerum uniuersalium sed singularium, in quibus actiones consistunt, quæ circumstantiæ dicuntur, & hæ sunt.*

*Quis, Quid, Vbi, & Quem, Quanam re, Cur, Quomodo, Quando.*

*Violentum illud est, cuius principium est externum, nihilq; confert id, quod agit aut patitur.*

*Quæ maiorum malorum motu fiunt, simpliciter quidem inuita sunt, sed tunc temporis spontanea . libro tertio capite primo.*

*Electio est earum rerum, quæ in nostra potestate sunt, appetitio, consultationem sequens.*

Consultatio est inquisitio de rebus difficilibus ac dubijs, quæ a nobis agi possunt, ut propositum finem assequamur. libro tertio capite tertio.

Cum duæ sint animæ facultates, quarum altera appetit, altera intelligit, illa quidem a moralibus uirtutibus, hæc uero a rationalibus excolitur, & ad propriam perfectionem perducitur: quare morales quidem uirtutes in appetitu consistunt, eumq; recte rationi obedientem reddunt, rationales autem in ipso intellectu consistunt; duæ quidem in eo qui agit, nempe prudentia, & ars, tres autem in eo qui contemplatur, nempe intelligentia, scientia, atque sapientia. libro primo cap. ultimo, & libro sexto cap. tertio.

Prudentia est habitus cum uera ratione coniunctus ad ea agenda idoneus, quæ homini bona sunt. libro sexto capite quinto.

Ars est habitus cum uera ratione coniunctus ad efficiendum idoneus. libro sexto cap. quarto.

Intelligentia est habitus, quo scientiarum principia absque ratione cognoscimus. libro sexto capite sexto.

Scientia est habitus demonstratione acquisitus. libro sexto capite tertio.

Sapientia est habitus, quo res præstantissimas diuinas scilicet substantias contemplamur. libro sexto capite septimo.

Prudentia, & ars inter se differunt, quod prudentia est habitus agendi, ars efficiendi, ex illo ho-

mo dicitur bonus, aut malus, ex hoc non simpliciter bonus, aut malus, sed bonus aut malus grammaticus, aut medicus, aut geometra: quodq; prudentia semper est cum uirtute coniuncta, ars autem a uirtute potest esse seiuncta: præterea qui in actionibus prudentiæ sponte peccat peior est, quàm qui inuitus, in arte uero qui inuitus peccat peior est: postremo prudentia non est obliuioni obnoxia, sicut ars.

Prudentia, & scientia inter se differunt, quod prudentiæ finis est agere, scientiæ contemplari, & scire, quodq; prudentia in rebus singulis, scientia in uniuersis uersatur: præterea quod prudentia in eo intellectu, qui est ad agendum idoneus, scientia in eo, qui ad contemplandum, consistit; nec est obliuioni obnoxia, sicut scientia.

Prudentia, et uirtus moralis inter se differunt, quod uirtus honestum finem eligit, prudentia idonea media ad illum obtinendum inuenit; quodq; uirtus in appetitu, prudentia in intellectu consistit; hæc quidem appetitui bene præcipit, illa uero appetitum bene præcipienti obedientem reddit, ac prudentia una est, uirtutes multæ. Verumtamen neque prudentia est sine uirtute, neq; uirtus sine prudentia. libro sexto cap. 12. & 13.

Prudentia aut unius hominis bonum spectat, aut multorum; nimirum aut familiæ, aut ciuitatis: quæ unius bonum spectat, prudentia proprie dicitur; quæ familiæ, familiaris, & æconomica;

quæ ciuitatis, civilis, & politica facultas appellatur: atq; hæc in duas partes distribuitur, eam quæ leges instituit, quæ nomothetice dicitur, & eam quæ remp. administrat, quæ civilis proprie nuncupatur; ac in duas partes secatur, deliberatiuam, & iudicialem, ad quam pertinet iuris prudentia. libro sexto capite octauo.

Prudentiæ propria est bona consultatio, quæ est rectitudo rationis in rebus agendis, qua uir prudens ad honestum finem obtinendum honesta media idoneo tempore perquirat. libro sexto cap. 8.

Ad prudentiam pertinent etiam synesis, guome, & solertia.

Synesis, quæ intellectio dici potest, est rectum iudicium de his, quæ in consultationem cadunt, & ab alijs prudenter inuenta sunt. libro sexto capite decimo.

Guome, quæ æquitas dici potest, alio tamen sensu quàm supra fuerit accepta, est rectum iudicium iuri æqui boni, qui alterius utilitatem spectat. libro sexto capite undecimo.

Solertia, quæ δεινότης græce dicitur, est facultas naturalis, qua quis ea quæ ad propositum spectant inuenire, & agere facile potest.

Quæ si ad malum uergat, græce πᾶνουργία, latine astutia dici potest. libro sexto capite duodecimo.

Ab hac diuersa est sagacitas, & bona coniectatio.

Est autem bona coniectatio, quæ græce dicitur  
*ὑποψία*, qua quis celeriter ex aliquo signo oc-  
 cultum quippiam cognoscit.

Sagacitas, quæ *ἄγχινοια* dicitur, & a multis  
 solertia, est bona coniectatio, qua quis celerrime  
 rei manifestæ occultam rationem attingit. libro  
 primo posteriorum analyticorum cap. ultimo.

Heroica uirtus est, qua quis communem homi-  
 num uirtutem longe superans alijs, qui uirtute  
 præditi sunt, antecellit; ut uiris fortibus fortitu-  
 dine, temperatis temperantia, iustis iustitia.

Feritas est habitus rationis experts, qui commu-  
 nem hominum malitiam superat.

Fitq; aut ex uitiosa natura, aut ex insania.

Sed & uitium modum superans feritatis nomi-  
 ne appellatur. libro septimo cap. primo, & cap. 5.

Continentia est habitus, qui prauas quidem  
 habet cupiditates, & rationi repugnantes, sed eas  
 tamen rationi parens compescit.

Incontinentia est habitus, quo quis a prauis  
 cupiditatibus, quanuis repugnante ratione, uin-  
 citur. aut sic.

Continentia est habitus, quo quis eas uolupta-  
 tes superat, a quibus plerique superantur.

Incontinentia est habitus, quo quis ab eis uo-  
 luptatibus superatur, quas plerique superant.

Tolerantia est habitus, quo quis eas molestias  
 superat, a quibus plerique superantur.

Mollities est habitus, quo quis ab eis molestijs

*superatur, quas plerique superant. libro septimo capite septimo.*

*Inter continentiam, & incontinentiam magna latitudo est, pariterq; inter tolerantiam, & molitiam; in eaq; pleriq; consistunt, quanuis ad deteriore partem declinent.*

*Incontinentia alia est infirma, alia festina illa quidem suscepto consilio recte agendi, hæc uero sine consilio ab affectu rapitur. libro septimo cap. 7.*

*Intemperans, et incontinens inter se differunt, quod intemperans ex consilio agit, sibi enim persuasit corporis uoluptates prosequendas esse, neq; suorum factorum pœnitet, perstat enim in consilio suscepto, quare insanabilis est, & omnino prauus, neque appetitum solum sed etiam rationem corruptam habet; & quoniam eius improbitas perpetua est, similis est aqua intercutem, aut tabe laboranti: Incontinens autem non ex consilio sed ex affectu agit, pœnitentia afficitur, sanabilis est, nec omnino prauus, atque appetitum quidem corruptum sed rationem integram habet; & quoniam non est eius perpetua improbitas, similis est comitiali morbo laboranti. libro septimo cap. octauo.*

*Pertinacia est habitus, quo quis ex praua opinione nulla ratione deducitur.*

*Differt autem a continentia, et tolerantia, quoniam continentia præstat ne a uoluptatibus, tolerantia ne a molestijs, ex recta opinione quis deducatur. libro septimo cap. nono.*



Habitus uero, quo quis ex recta opinione nulla ratione deducitur, constantia esse uidetur, sub eaq; continentia, & tolerantia contineri.

*Voluptatis multæ traditæ sunt definitiones, nonnulli eam esse dixerunt generationem sensibilem ad naturam; quam definitionem Aristoteles refert libro septimo cap. undecimo, eamq; refellit cap. 12. necnon, & libro decimo capite tertio.*

*Ei similis est definitio, quam ipse affert libro primo rhetorices capite undecimo; cum uoluptatem ponit esse motum animi quendam, ac momentaneam constitutionem, eamq; sensibilem in naturam insitam.*

*Nec dissimilis est Platonis definitio in Timæo & in Filebo, quam Galenus libro de causis symptomatum capite sexto breuibus explicat, hoc modo. Pathos præter naturam uiolenter, & affatim incidens dolorem excitat, quum uero ad naturalem habitum redit, idq; rursus affatim, delectationem inducit, at quod sensim paulatimq; fit, sensu non percipitur. Quamobrem ex Platonis, & Galeni sententia Voluptas erit affectus ex re ad naturalem habitum affatim reducete.*

*Sed hæ definitiones non omni uoluptati, sed ei tantum, quæ ad tactum pertinet, conuenire uidetur.*

*Aliam uoluptatis definitionem affert Aristoteles, eodem libro septimo de moribus cap. 12. ipsam esse dicens actionem profectam ab habitu*

natura conuenienti, & non impedito. Quæ definitio eam tantum uoluptatem, quæ ad rationalem animi partem pertinet, explicare uidetur.

Sed libro decimo capite quarto uoluptatem definit non solum, quæ ad rationem, sed etiam quæ ad sensum pertinet, eam esse dicens actionis perfectionem. Perfectam autem actionem esse dicit, quando sensus aut mens optime affecta in re obiecta optima uersantur.

Amabile est id, quod est bonum. Amabile unicuique, quod unicuique uidetur bonum.

Amicitia est beneuolentia inter aliquos mutua, & non occulta. libro octauo cap. secundo.

Triplex autem est, alia enim utilitatem; alia uoluptatem, alia honestatem spectat. libro octauo cap. tertio.

Ac duæ quidem priores amicitie per accidens, siue ex euentu ab Aristotele dicuntur, quod in ijs amicus non propter se, sed utilitatis aut uoluptatis gratia amatur: postrema uero per se, quod in ea amicus propter se, id est propriæ uirtutis causa amatur: atque illæ quidem facile dirimuntur, eo scilicet dissoluto, quod amicitiam contraxerat, hæc autem firma, & stabilis est, cum & uirtus, qua nititur, diuturna sit, & maxime stabilis.

Reip. tria sunt genera, Regia potestas, optimatum principatus, quæ græco nomine dicitur Aristocratia, & ex censu potestas, quæ dicitur Timocratia, ac communi nomine Resp. nominatur. Et

que in ipsis amicitie sunt, ciuiles dicuntur.

His totidem sunt genera contraria, in quæ sæpe illa degenerant. Regiæ quidem potestati aduersatur tyrannis; tyrannus enim suam, rex eorum, quibus imperat, utilitatem spectat.

Aristocratia oligarchia, idest paucorum principatus, aduersatur, in illa enim optimi ac præstantissimi magistratum gerunt, qui commune ciuitatis bonum spectant, in hac uero pauci quidam, & prauis, qui non commune, sed diuitum tantum bonum intuentur, & sibi proponunt.

Timocratia siue reip. democratia aduersatur, in illa enim tam diuites quam pauperes reip. administrant, ac commune omnium bonum spectant; in hac uero pauperes dominantur, qui ad proprium commodum omnia referunt. libro octauo de moribus cap. 10. & tertio politices capite quinto.

Beneuolentia etiam erga ignotos, & occulta potest esse, ac sine consuetudine, & repente fieri, quare ab amicitia plurimum differt.

Dilectio etiam earum rerum est, quæ sunt inanimatae, & redamare nequeunt, sed intentionem atque appetitionem habet, & est cum consuetudine coniuncta. libro nono capite quinto.

Qui aliquem diligit, fieri amicus ei cupit, quem diligit, sed qui est beneuolus, non cuicumque est beneuolus, effici amicus uult. Eustratius ibidem.

Amor est, cum quis rei amatae forma delectatur, absentem uehementer desiderat, eiusque præsen-

tiam concupiscit. *Aristoteles ibidem.*

Concordia est civilis amicitia in ijs rebus, quæ sub actionem cadunt, atque ijs præcipue, quæ magnitudine excellunt, possuntq; utrisq; uel omnibus inesse. libro nono capite sexto.

Felicitas duplex est, alia in actione uirtutum moralium, alia in actione mentis ex propria uirtute, id est in rerum contemplatione, consistit: atq; illa quidem humana est, quod actiones uirtutum moralium cum corpore communicant, & actiua, civilis, & moralis, nuncupatur; altera uero, quam contemplatiuam dicunt, melior est atque præstantior, quam hominis natura ferat: non enim qua homo est, ita uiuit, sed qua diuinum quiddam in eo inest; & quanto mens toti, & composito antecellit, tanto eius actio eis actionibus præstat, quæ alijs uirtutibus consentaneæ sunt. libro decimo capite septimo, & octauo.

24  
68

DE LOGICES VSV  
IN ARISTOTELIS TOPICA  
P R A E F A T I O.



*N* omnibus disciplinis magno-  
pere illud referre existimo, ut  
earum usus, ueluti scopus qui-  
dam, mentis oculis proponatur:  
cum enim omnes homines, boni  
cupiditate trahantur, qui pro-  
positæ disciplinæ usum probè nouerint, ad eam  
percipiendam excitantur, atq; accenduntur, ac  
laborem omnem, quem in ea perdiscenda suscipere  
necesse est, in scopum illum intuentes libentius, &  
æquiori animo sustinent: tantaq; in eo scopo uis  
est, ut quæcunq; ad ipsum diriguntur, & spectant,  
utilia sint, studioque dignissima, contra quæ aber-  
rant ab eo, longeq; disiuncta sunt, omnia inutilia,  
& superuacanea existimentur. Verum discipli-  
næ quædam sunt, quarum usus est ualde perspi-  
cuus, ueluti Medicina, & Iurisprudentia; ut mi-  
nores interim artes, quibus ciuitates refertæ sunt,  
omittamus; in quibusdam autem usus est paulo  
obscurior, & a communi intelligentia remotior;  
quarum ex numero cum Logicam disciplinam esse  
intelligerem, operæpretium me facturum existi-  
maui, Nobilissimi Adolescentes, si eius usum  
hac præfatione, quam uos Viri doctissimi ac præ-  
stantissimi amplissimo conspectu uestro ornandam

censuistis, pro ingenij mei uiribus exponerem, & patefacerem; ne eius ignoratione disciplina illa negligatur, quæ, ut inquit Cicero, per omnes partes sapientiæ manat, et funditur: ex qua cum summa utilitas existit ad res ponderandas, tum maxime ingenua delectatio, et digna sapientiæ: sed iam, sublata longioris exordij cunctatione, ad propositam rem aggrediamur.


De Logicæ disciplinæ usu uerba facturi commodum fore putauimus, si ab eius definitione initium sumeremus. Logicam igitur disciplinam docendi, & disputandi artem esse dicimus. Quauis enim aliæ quoque disciplinæ, & doceant, & disputent, nulla tamen earum quemadmodum docendum sit, & disputandum, tradit; sed hoc sibi Logice uendicat. Ac pars quidem illa, quæ ad docendum pertinet, Didascalice dici potest, & Methodi nomine a quibusdam nuncupatur; quæ uero in disputando uersatur, Dialectice appellari consuevit: eaq; in his libris topicis, quos nunc interpretandos sumpsimus, ab Aristotele traditur. Prior illa, nempe Didascalice, quatuor methodos continet, demonstrandi, resoluendi, definiendi, ac diuidendi; de quibus alias, Nobilissimi Adolentes, uobiscum egimus copiosius, nunc autem earum duntaxat usum exponemus, & exemplis quibusdam declarabimus.

Demonstratiua methodus, ut ab ea tanquam digniori, & cui ceteræ deferuiunt, exordiamur,  
usum



usum habet maximum; uerum enim a falso ita distinguit, ut quod uerum esse demonstratur, nullo modo possit esse falsum; neque uerum ullo modo esse queat, quod falsum esse demonstratione conuincitur: quare demonstratio est instrumentum, quo scientia, idest cognitio ueri certissima, ac prestantissima, comparatur, quæ est humanæ mentis magna perfectio. interdum autem demonstratio, & rem ipsam ostendit nobis antea ignotam, et eius causam: uelut in phisicis, per uacuum motum fieri non posse: quodcunque mouetur esse diuisibile: ac in mathematicis, diametrum quadrati cum eius latere nullam communem mensuram habere: quod sane genus demonstrationis prestantissimum est, & perspicuam habet utilitatem: interdum uero demonstratio solum ostendit causam rei, quæ iam nobis est nota; ueluti quare Luna uarias habeat lucis mutationes; & quare dies æstiuæ sint hyemalibus longiores: quod sane genus licet altero inferius sit, non inutile tamen censendum est: quanuis enim rem ipsam sensu cognoscamus, sicuti lunam uarias habere lucis mutationes, aut aliqua etiam ratione, sicuti morborum species ex suis signis cognoscimus, scientiam tamen, nisi perspecta fuerit causa, non habemus. Fiunt autem in mathematicis demonstrationes plurimæ, ac firmissimæ; tum quod in ijs uersantur, quæ suapte natura perspicua sunt; non obscura, et incerta, ueluti naturalia; neque supra mentis nostræ aciem posita, ue-

luti diuina , sed eius captui maxime accommoda-  
ta ; tum quòd nihil unquam sumunt , quod non sit  
aut per se notum , aut antea demonstratum ; ac fi-  
guris ascriptis propositum apertissime còcludunt.  
Quapropter in scientia quoq; naturali demonstra-  
tiones illæ , quæ figuris etiam adhibitis mathema-  
ticas imitantur , & lineares dicuntur , sunt alijs  
præstantiores : ueluti si demonstremus , A quæ su-  
perficiem , & si plana esse uideatur , ad sphericam  
tamen figuram accedere ; hoc modo . Ponamus  
primum aquam ad locum inferiorem naturaliter  
fluere ; atq; illum esse inferiorem , qui est centro  
propinquior . Quibus positis , sit aquæ superficies,  
plana , si fieri potest , b c d ,  
quoniam locus c est centro  
propinquior , sequitur , ut  
sit etiam inferior , aqua igi-  
tur ad ipsum confluet , neq;  
fluere cessabit , donec omni  
ex parte æque distet a cen-  
tro ; aliter enim semper es-  
set aliquis locus inferior ; sed cum omni ex parte  
æque distabit a centro , rotundam figuram obtine-  
bit . Patet itaq; demonstratiuæ methodi usus ; de  
qua cum in commentario de proprijs libris Gale-  
nus loqueretur , se nihil rerum omnium inquit ad-  
discere ita studuisse , ut methodum demonstrandi ,  
eiusq; rei gratia se omnes eo tempore claros philo-  
sophos , cum stoicos , tum peripateticos , audiuisse  
testatur .



Resolutiua methodus sequitur, cuius præcipuus usus in demonstrationis medio inuestigando consistit: sumitur enim id, quod queritur, perinde ac notum, & concessum, & per ea, quæ ex illo necessario cõsequuntur, progressus fit, donec ad aliquid uere notum, & concessum perueniatur; quod si uerum sit, illud etiam quod queritur uerum est, si falsum; illud quoque falsum esse necesse est: quo fit, ut resolutionis beneficio uerum ne sit id, quod querimus, an falsum, & qua ratione utrunque demonstrari possit, inuestigemus: si enim resolutio ad uerum peruenit, inde initio sumpto, quo ipsa terminatur, & conuerso ordine procedentes propositum demonstramus; si autem ad falsum peruenit, ipsamet resolutio est demonstratio deducens ad id, quod fieri nequit. In mathematicis quidem disciplinis resolutio præcipuum, & maximum habet usum, sed in alias etiam disciplinas sese fundit; ueluti si in quæstionem uocetur, utrum anima sit immortalis, hoc ipsum, quod queritur, accipio tanquam concessum, atq; ita ratiocinor; Quandoquidem anima est immortalis, pro bonis, et malis actionibus pænæ, & premia post obitum tribuuntur; quod si uerum est, actiones humanæ iudicantur; & si actiones humanæ iudicantur, est diuina prouidentia; quod uerum esse non dubitamus: itaq; ex animæ immortalitate, quam quærebamus, ad prouidentiam peruenimus, quam esse minime dubium est. possumus deinde, conuerso or-

dine redeuntes, ex diuina prouidentia animæ immortalitatem concludere, hoc modo : si est diuina prouidentia, actiones humanæ iudicantur ; si actiones humanæ iudicantur, pro bonis, & malis actionibus pænæ, & premia post obitum tribuuntur ; cum id in hac uita plerunque non fiat ; quod si uerum est, animam immortalem esse necesse est. Hæc est illa resolutio, qua demonstrationis medium inuestigatur, quare cum in scientijs demonstratio- nis usus sit maximus, usus etiam resolutionis magnus profecto erit, qua illud inuenitur, sine quo demonstratio constitui nullo modo potest.

Ab hac demonstratiua resolutione illa non est admodum diuersa, quæ a notione finis incipit, ac per ea progreditur, quæ sunt finis gratia, donec ad aliquid perueniat, quod primo agendum sit : ueluti si febris putrida sit a nobis curanda, ita progrediemur. Quoniam febris a putredine fit, nisi hæc auferatur, ea curari non poterit : auferetur autem, si primum putredinis causæ tollantur, deinde qui putrescenti sunt humores educantur : sed putredinis causa est obstructio, hæc igitur primum tollenda est ; tolletur autem, si & quod eius factum est curetur, & quod futurum est propulsetur : curabitur quidem id, quod factum est, si ea adhibeantur medicamenta, quæ obstructa aperiunt ; propulsabitur id, quod futurum est, si fluxio obstructentium succorum tollatur : primum igitur obstructentium succorum fluxio tollenda est, deinde ea exhibenda,

quæ obstructa aperiunt, demum putrefacti humores educendi sunt. Hæc quidem resolutio, quæ a notione finis incipit, ad illud primum prodest, ut quid in qua; re agendum sit, prudenter inquiremus, deinde & ad artes, ac disciplinas constituendas facit: quod & Galenus de medica arte sæpe numero testatus est, & nos hoc in loco Logicæ disciplinæ exemplo declarabimus. Philosophiæ partes duæ sunt, θεωρητικὴ, quæ in rerum contemplatione uersatur, & πρακτικὴ, quæ bene uiuendi rationem persequitur: illius quidem finis est cognitio ueritatis, huius uero boni adeptio: quoniam autem utrisq; sua contraria opponuntur, ueritati quidem mendacium, bono uero malum, ideo rationalis anima, cum imperfecta sit, pro bono sæpe numero malum eligit, ac falsum esse uerum frequenter existimat: quemadmodum igitur fabro opus est norma, qua recta discernat ab obliquis, ita rationalis anima instrumento aliquo indiget, quo bonum a malo, & uerum a falso distinguat: hoc autem est demonstratio: de ipsa igitur demonstratione, ueluti re ad philosophandum magnopere necessaria, philosophus sibi agendum proponit: quo fine posito ita deinde resoluit. Quoniam demonstratio est syllogismi species; est enim syllogismus, qui scientiam efficit; non potest autem species recte cognosci, nisi eius genere antea cognito, ideo de syllogismo prius, quam de demonstratione agendum est: quoniam autem syllogismus ex

75  
propositionibus constat, neq; potest aliquid recte  
cognosci, nisi partes, ex quibus constat, antea co-  
gnoscantur; prius igitur de propositionibus tra-  
ctandum est; cum autem propositiones ex simpli-  
cibus uocibus componantur, eadem ratione de his  
prius agere necesse est; & quoniam resolutio ultra  
non procedit, finisq; resolutionis compositionis prin-  
cipium existit, ideo de simplicibus uocibus pri-  
mo loco tractare oportet, deinde de propositioni-  
bus, postea de syllogismo, postremo de ipsa demon-  
stratione: ita igitur quemadmodum resolutio ad  
artes ac disciplinas constituendas conducatur, mani-  
festum est.

Est tertia insuper resolutio, quæ syllogistica dici  
potest, qua compositas rationes in suos syllogismos  
dissoluimus, eosq; ad propriam figuram, et modum  
reducimus. Erit illa nobis ratio exempli loco,  
qua in primo naturalis auscultationis utitur Ari-  
stoteles, ad probandum, præter contraria aliud prin-  
cipium ponendum esse. Nullius (inquit) eorum,  
quæ sunt, uidemus contraria esse substantias, prin-  
cipium enim de subiecto aliquo dici non debet, erit  
enim principij principium, quoniam subiectum  
principium est, & prius eo quod de subiecto dici-  
tur. Deinde substantiam substantiæ contrariam  
esse non dicimus, quomodo igitur ex non substan-  
tijs substantia erit? aut quomodo non substantia  
prior erit substantia? Quam nos rationem ita re-  
soluimus: Contraria non sunt substantiæ, principia



sunt substantiæ, ergo principia non sunt contraria:  
 at principia esse substantias, ex eo probatur, quod  
 si substantiæ non sint, erunt accidentia, & si acci-  
 dentia sint, erunt in subiecto, quod fieri non potest;  
 cum enim subiectum sit principium, & prius eo,  
 quod est in subiecto, sequetur principij. esse prin-  
 cipium; quod quidem absurdum est. Deinde sub-  
 stantia non est contraria substantiæ, principia  
 sunt contraria, ergo principia non sunt substantiæ;  
 quod falsum est; nam si substantiæ non sint, seque-  
 tur ex eo, quod substantia non est; substantiam fie-  
 ri, & quod non est substantia prius esse substan-  
 tia: consequitur autem falsum illud ex eo, quod  
 positum est, principia esse contraria; quamobrem  
 principia non erunt contraria. Hæc est syllogismo-  
 rum resolutio, quæ magnum sane atq; præclarum  
 habet usum; ad rationes enim intelligendas, &  
 explicandas, earumq; pondera examinanda; con-  
 ducit. Quod si quis facilius aliquod exemplum  
 requirat, hoc accipiat, quo animæ immortalitas  
 ex Platonis sententia probatur: Anima non mo-  
 uetur ab alio; quod ab alio non mouetur, per se  
 mouetur; quod per se mouetur, semper mouetur;  
 & quod semper mouetur, est immortale; quare ani-  
 ma est immortalis. Hanc nos rationem in tres  
 syllogismos resolvemus: quorū primus quidem est;  
 Quod ab alio non mouetur, per se mouetur; anima  
 ab alio non mouetur; ergo per se mouetur: secun-  
 dus vero est; Quod per se mouetur, semper moue-



tur; anima per se mouetur; ergo semper mouetur: tertius autem est: Quod semper mouetur, est immortalis; anima semper mouetur; ergo anima est immortalis. Sed iam tempus est, ut ad definitiuam methodum transeamus.

Definitiuam methodus triplicem habet usum: primo enim his, quæ tractantur, magnam affert perspicuitatem; tollit enim eam obscuritatem, quam in tota tractatione sequi necesse est, si ignoretur quid sit id de quo agitur: qua quidem ratione M. Tullius Socratem secutus recte præcepit, disputationem omnem a definitione proficisci debere, ut intelligatur, quid sit id, de quo disputetur. Deinde definitio magnum in rerum cognitione momentum habet: cum enim quicquid est in rebus substantia sit, uel accidens, rerum quidem accidentia demonstratione, substantiam uero definitione cognoscimus: præterea definitio ad demonstrationem non solum utilis est, sed etiam ualde necessaria; est enim eius principium, ac ueluti fundamentum: quo circa mathematici, artifices in demonstrando exquisitissimi, definitiones suas prius ponere consueuerunt, quàm aliquid demonstratione cōstruere aggrediantur. Pro medio etiam demonstrationis definitio sumitur, aut scilicet eius quod demonstratur, aut eius de quo demonstratio fit: eius quidem quod demonstratur, quando quæritur, quare id subiecto insit; ut quare luna eclipsim patiatur: eius uero de quo demonstratio fit; quando

queritur, quare ipsi insit attributi ratio; ut quare luna interposita terra lumine priuetur. Ac mathematicæ quidem demonstrationes in attributi definitione solent consistere, naturales uero ad subiecti, etiam definitionem perueniunt. Neque tamen semper definitio pro medio demonstrationis assumitur: sæpenumero enim ex communibus notionibus, quæ axiomata dicuntur a peripateticis, aut ex antea demonstratis conclusionibus mathematici medium sumunt: neque minus alia scientiæ alijs medijs, quam definitionibus in demonstrando utuntur. Definitionis exempla passim in promptu sunt; ueluti cum dicimus, Animam esse actum corporis naturalis organici: aut in mathematicis, spheram esse figuram solidam, quæ describitur a semicirculo, qui manente diametro eousq; circumducitur, donec eo redeat, unde incepit moueri. Methodum hanc excellentes quidam scriptores adeo extollunt, ut eam demonstratiuæ etiam anteponant: quoniam scilicet definitio substantiæ rerum cognitionem efficiat, demonstratio uero accidentium, substantiamq; accidentibus digniorem esse constet.

Diuisiua methodus superest, cuius etiam triplex est usus: primo enim ad rerum cognitionem utilis est, nam & totum distribuit in partes, & genus diuidit in species, & subiectum in accidentia; ut alios quosdam diuisionis modos nunc omitamus: horum autem unumquodque in rerum co-

62  
gnitione uim habet maximam, siue earum inuen-  
tionem, siue doctrinam, siue disciplinam specte-  
mus. Ad definitionis deinde inuentionem, & di-  
spositionem confert diuifio; eius enim ope inuesti-  
gamus, quænam in definitione sumenda sint, &  
quo ordine singula disponenda. Postremo diuifio  
ordinem in scientijs præstat; ostendit enim quid  
primum, quid secundum, quid tertium, atq; ita  
deinceps collocandum sit, ut nihil temere, & for-  
tuito, sed omnia apte inter se connexa, serie qua-  
dam admirabili disponantur; quod & perspicui-  
tatem in rebus parit, & constantem sibi ipsi con-  
cordiam; & ad eorum, quæ traduntur, memoriam  
mirifice conducit. Ad diuifionem distinctio eorum  
reducitur, quæ multis modis dicuntur; quæ ad  
perspicuitatem disputationis in primis facit; fa-  
cilis enim quid sit id, de quo agitur, si perspi-  
cium fiat, quot modis dicatur, intelligetur:  
Deinde ut de re ipsa, non de nomine, disputetur;  
nam si incertum sit, quot modis dicatur id, de quo  
agitur, facile fiet, ut is qui respondet, & is qui  
interrogat, non eodem modo intelligat, itaque de  
nomine, non de re ipsa imprudenter dissentiant:  
Præterea ne fallaci argumentatione, quæ ex no-  
minum ambiguitate plerunque ducitur, ab aliquo  
capiamur; quare & ad controuersias dirimen-  
das, quæ ob eam causam siue frequenter existunt, uti-  
lis est. Vt autem diuifionis exemplum aliquod  
afferamus, libros, qui de Logica disciplina sunt ab

*Aristotele conscripti, diuidemus. Eorum igitur alij sunt de syllogismo, alij de eius principijs; qui sunt de principijs, aut de remotis sunt, aut de propinquis; qui sunt de syllogismo, alij de ipso agunt generatim, & uniuerse; alij singulas eius species tractant; nimirum syllogismum demonstratiuum, dialecticum, & sophisticum; neque enim plures sunt syllogismorum species. De principijs quidem remotis agitur in categorijs; de propinquis in libro de enuntiatione; de syllogismo generatim in prioribus analyticis; de syllogismo demonstratiuo in posterioribus; de dialectico in libris topicis; & de sophistico in Elenchorum libris tractatur. Sed facultates etiam animæ diuidamus; hanc enim diuisionem, prestantissimi Auditores, cum & huius methodi usum patefaciat, & ad alia insuper multa conferre possit, uobis non ingrata fore arbitror. Facultatum igitur animæ alia est rationalis, quæ est hominis propria, alia rationis expers, quæ est homini cum alijs animalibus communis; atq; hæc in animale diuiditur, quæ est homini cū cæteris animalibus conuenit, & naturalem, quæ ipsi cum plantis communis est; naturalis facultas tripertita est, nutriendi, augendi, & generandi; animalis pariter triplex est, sentiendi, appetendi, & mouendi; mouendi facultas duplex uidetur esse, alia enim musculorum interuentu membra ac totum corpus mouet, alia uero perenni quadam motione cor et arterias*

agitatur; appetens autem irascendi uim, & concupiscendi comprehendit; sentiens uero in exteriorem, & interiorem secatur; exterior quinque facultates continet, aspectum, auditum, odoratum, gustatum, & tactum; interior sensum communem, imaginationemque; ad quam memoria pertinet, complexa est. Rationalis autem facultas, aut potius anima, quæ ab irrationali, ut perpetuum a caduco separatur, græce dicitur νόος, latine mens, uulgo autem intellectus; qui ut rudis est, & cognitionis expers, dicitur intellectus potestate; ut scientiam habet, habitu: atque hic, ut in rerum contemplatione uersatur, θεωρητικός dicitur, ut in rebus gerendis, πρακτικός: in tres autem facultates distribuitur, intelligentiam, rationem, & opinionem: intelligentia, quæ totius substantiæ nomen assumens appellatur νόος, & rerum essentias, & principia demonstrationis simplici quadam comprehensione percipit; ratio, quæ λόγος dicitur, a principiis ad conclusiones progreditur, & rerum proprietates demonstratione cognoscit: opinio uero, quæ dicitur δόξα, in rebus tantum incertis, aut suapte natura, aut ratione cognitionis, uersatur. De hac methodo cum loqueretur socrates in Phædro, dicebat: Huiusmodi diuisiones, collectionesque; o Phædre, amo, quo, & intelligendi, & loquendi sum compos, ac si quem alium, & unum, & multa pro rerum natura perspicere posse arbitror, eius ego uestigia, uelut numinis cuiusdam,

sequor ; atque eos, qui id facere possunt, recte ne an  
contra nominem , Deus ipse nouit, uoco autem ha-  
ctenus Dialecticos.

Cum duæ sint positæ Logicæ disciplinæ partes,  
didascalice, & dialectice, illius usum hæctenus ui-  
dimus, huius autem, de qua a nobis in his libris to-  
pici exponendis copiose. agendum est, usum nunc  
consideremus. Dialectica est facultas de qua-  
cunque proposita quæstione probabiliter differendi:  
ad unamquamq; enim quæstionem pertractandam  
argumenta suppeditat : & quoniam interrogan-  
do, & respondendo differere consuevit, qua arte in-  
terrogandum sit, ostendit, ut quod nobis est propo-  
situm cõcludamus ; & si respondere nobis sit opus,  
qua etiam arte respondendum sit, ut sententiam  
nostram tueamur, & nihil absurdum dicamus.  
Neq; alteram tantum propositarum quæstionum  
partem, sed utranq; , dialectica probare, & tueri  
potest ; ut mortem, aut. noluptatem, aut scientiã,  
esse bonam, uel malam : Ius ciuile medicinæ, aut  
medicinam iuri ciuili ; studium literarum militiæ,  
aut ei militiam, præstare. Quibus in quæstionibus  
disputandis adolescentes assuescere pulcherrimum  
certe est exercitationis genus, quo & Aristotelem  
usum fuisse Cicero tradit. Hinc autem intelligere  
licet, dialectica facultate bene ac male uti nos pos-  
se ; non aliter quàm eloquentia, armis, potentia,  
alijsq; bonis omnibus, una excepta uirtute : neque  
ob id tamen ea sunt improbanda ; unaquæque enim



res ex proprio usu, non abusu æstimanda est. nam  
si abusum spectemus, nihil est fere tam rectum, aut  
tam sanctum, quod non deprauari, atque uiolari  
queat. quo quidem errore ducti quidam, inepti sa-  
ne atq; impij, nostræ tempestatis homines sacro-  
sanctas christianæ religionis institutiones ualde  
impudenter exagitarunt. Porro utilis est diale-  
ctica ad gymnasiorum disputationes, ad ciuiles  
congressus, ad scientias, & ad rhetoricam; ad  
gymnasiorum quidem disputationes; quod in his  
modo in utranque propositæ quæstionis partem,  
argumentari operæpretium est, modo aliorum sen-  
tentias infirmare, modo nostras tueri, aliorumque  
argumenta dissoluere; hæc autem absq; dialecti-  
cæ beneficio præstari nequeunt. Ad ciuiles autem  
congressus, & colloctiones conducit; quoniam in  
his, & probandi aliquid, et improbandi occasiones  
frequenter incidunt; in quibus probabiles ratio-  
nes, quæ dialecticæ sunt, exquisitis etiam argu-  
mentis antecellunt; quoniam communi hominum  
captui sunt magis accommodatæ. Ad scientias  
autem confert, cum ut probentur earum principia,  
tum ut ueritas inuestigetur: scientiarum enim prin-  
cipia proprijs ac necessarijs rationibus probari  
nequeunt; quod si interdum ea probare aut tueri  
oporteat, ad dialecticam hoc munus pertinet: qua  
quidem ratione scientiæ omnes huic facultati plu-  
rimum debent; quod scilicet earum principia ubi  
sit opus confirmet, & ab his, qui ea demoliri ten-



tent, ualidis sine tueatur. Ad inuestigandam au-  
 tem ueritatem proficit; quoniam tunc demum,  
 quid uerum sit, aut falsum, prudenter iudicari po-  
 test, cum in utranque propositę quęstionis partem  
 rationes afferuntur. Huc accedit quod dialectica  
 studiosorum ingenia mirifice exacuit, et ad omnem  
 reddit contemplationem, & commentationem  
 aptissima; ut uel hac sola ratione summa commen-  
 datione digna esse uideatur. Dialecticę demum  
 usus in rhetorica maxime cernitur, ea enim, &  
 argumenta inuenit, & inuenta certis quibusdam  
 nexibus, extra quos parum habent firmitatis,  
 astringit; & ea quę diffuse, et late explicata sunt,  
 dempto uerborum anfractu breui quadam, &  
 astricta ratione concludit, & quid in eis reprehen-  
 dendum sit, diligenter ostendit. Ex quo consequi-  
 tur eos, qui eloquentiam adipisci student, dialecti-  
 cam etiam facultatem sibi assumere debere: quod  
 ut magis probetur, Ciceronis, Platonisq; testimo-  
 nium afferre libet. Cicero quidem in suo oratore;  
 Esse (inquit) perfecte eloquentis puto, non eam  
 solum facultatem habere, quę sit eius propria, su-  
 se lateq; dicendi, sed etiam uicinam eius, atq; fini-  
 timam dialecticorum scientiam assumere; quan-  
 quam aliud uidetur oratio esse, aliud disputatio,  
 nec idem loqui esse, quod dicere, attamen utrunq;  
 in differendo est; disputandi ratio, & loquendi  
 dialecticorum sit, oratorum autem dicendi, &  
 ornandi. Zeno quidem ille, a quo disciplina stoico-

rum est, manu demonstrare solebat, quid inter has artes interesset; nam cum compresserat digitos, pugnumq; fecerat, dialecticam aiebat eiusmodi esse; cum autem diduxerat, palmæ illius similem eloquentiam esse dicebat. Hæc ibi: in libro uero de claris oratoribus; Eram (inquit) cum stoico Diodoro, qui cum habitauisset apud me, nuper est domi meæ mortuus; a quo cum alijs in rebus, tum studiosissime in dialectica exercebar, quæ quasi cōtracta quædam eloquentia putanda est, sine qua etiam tu Brute iudicauisti te illam iustam eloquentiam, quam dialecticam dilatatam putant, consequi non posse. Plato autem in Phædro, inquit, Periclem oratorum omnium perfectissimum extitisse, quoniam exercitationem dialecticam, & rerum sublimium contemplationem ad ingenij acumen adiunxerat. quàm magnus itaque sit, & quā late pateat dialecticæ usus, ex his quæ diximus, satis intelligi posse arbitror.

Quoniam autem dialecticam rhetoricæ plurimum prodesse ostendimus, non iniuria dubitari posset, utra earum præstantior existimanda sit: quæ res licet hætenus, quod sciam, in controuersiam adducta non sit, inquisitione tamen digna esse uidetur; eam igitur hoc loco breuissime perstringere mihi uisum est, ut ipsius etiam dialecticæ usus hoc exemplo satis quidem, ut opinor, ad rem, de qua agitur, accommodato, declaretur. Et quoniam unicuique studium proprium commendare licet; ac  
iuxta

*in* iuxta uetus adagium, quam nactus est spartam,  
hanc ornare, dialecticam ego rhetoricæ præstare  
conabor ostendere; ijs tamen, qui a nobis dissen-  
tiant, facile concedens, ut rhetoricam uicissim  
extollant, ac dialecticæ, si libeat, anteponant.  
Dialectica igitur rhetoricæ præstare nobis uide-  
tur, quoniam siue argumentandi genera specte-  
mus, quibus utitur, siue materiam, in qua uersa-  
tur, exquisita magis esse deprehenditur. cum enim  
quatuor sint argumentandi genera, syllogismus,  
inductio, exemplum, atq; enthymema, dialectica  
quidem, ut Aristoteles sæpenumero tradit, syllo-  
gismo utitur, & inductione, rhetorica uero exem-  
plo, & enthymemate, quæ sunt prioribus multo  
imperfectiora: quod si materiam consideremus, in  
ijs certe dialectica uersatur, quæ sunt a materia  
magis seiuncta; rhetorica enim quæstiones illas  
tractat, quæ certis locis, personis, & temporibus  
definitæ sunt, et a nostris causæ appellantur, a græ-  
cis ὑποθέσεις; ueluti quod Milo Clodium iure  
interfecerit; dialectica uero quæstiones tractat  
uniuersales, quæ neq; locis, neque personis, neque  
temporibus definitæ sunt, & a Cicerone proposita,  
a græcis θεῖσις dicuntur; ueluti quod anima sit  
immortalis, quodque peius sit iniuriam facere,  
quàm pati: scientiam autem illam, quæ in magis  
seiunctis a materia, uersatur, magis exquisitam es-  
se dicimus; qua sane ratione geometria perspecti-  
uæ præstat, & arithmetica musicæ. quæ si uera

32  
sunt, dialectica exquisita magis erit, quàm rhetorica, eaq; ratione præstantior. Quòd si quis putet rhetoricam etiam in communibus illis questionibus disputandis uersari, is cum Herimagora quidē consentiet, sed ab Aristotele, & M. Tullio præclarissimis huius artis scriptoribus longe dissentiet; hi enim rhetoricæ tria illa causarum genera supponunt, iudiciale, deliberatiuum, demonstratiuum; communes uero quæstiones procul ab oratoris officio remotas esse uolunt: ut enim inquit M. Tullius, quibus in rebus summa ingenia philosophorū plurimò cum labore consumpta intelligimus, eas sicut aliquas paruas res oratori attribuire, magna amentia uidetur. Deinde dialectica in ijs uersatur, quæ priora sunt, & meliora, nimirum in argumentis inueniendis, formandis, & soluendis; rhetorica uero in eo potissimum differt a dialectica, quòd in externis quibusdam rebus, quæ ab oratoribus adhibentur ad animos conciliandos, commouendos, et delectandos, est occupata: quamuis enim & in prioribus illis uersetur, id tamen proprium eius artificium non est, sed a dialectica mutuatur: quamobrem Aristoteles rhetoricam in probationibus a dialectica pendere, & ob id propaginem eius quandam esse, testatus est: cum autem sit illud melius, quod in prioribus, & melioribus consistit, dialecticam rhetoricæ præstare necesse est: hæc enim ratione, et robur corporis pulchritudini præstare dicimus; quòd hæc quidem in membrorum

*symmetria quadam, illud uero in ossibus, & ner-  
 uis, quę priora sunt, & meliora, consistat. Præte-  
 rea dialecticam scientijs magno esse usui compertū  
 est: id enim et nos ante ostendimus, & Aristote-  
 les usu comprobat, dum scilicet dialecticis rationi-  
 bus in philosophia fręquenter utitur; & Plato in  
 Phædro testatur, dum inquit, artes omnes nobiles  
 dialectica exercitatione indigere; rhetoricam ue-  
 ro, quod sit ad ueritatis inuentionem, & traditio-  
 nem inutilis, a scientijs excludi uidemus: quare et  
 Galenus in libris de Hippocratis, & Platonis de-  
 cretis Chrisippum stoicum carpit, quod in philoso-  
 phia rhetorica uteretur; & Socrates apud Plato-  
 nem cum Gorgia rhetore differens, ipsum rogat, ut  
 prolixitatem uerborum in aliud tempus reseruās,  
 ad interrogata quā breuissime respondeat: cum  
 igitur dialectica magnum in scientijs usum ha-  
 beat, a quibus rhetorica excluditur, iccirco præ-  
 stantior existimanda est. Illud deinde constat,  
 scientiam, & dialectica, & rhetorica, quę faculta-  
 tes sunt quedam, præstantiorem esse; cum autem  
 dialectica scientiæ similior sit; quā rhetorica,  
 cumq; sit illud melius, quod est meliori similis,  
 dialecticam rhetorica meliorem esse consequitur.  
 Est autem dialectica scientiæ propterea similior,  
 quod non aliter ac scientia prolixitatem, ac lenoci-  
 nia uerborum fugiens, breuiter, & sincere de rebus  
 agit, rhetorica uero copiosa, abundanti, & uaria  
 oratione utitur, pompamq; & ornamenta uerbo-*

rum affectat: iam neque animi affectus dialectica  
commouet, quemadmodum neque scientia, sed ra-  
tionibus tantum innixa liberum alioqui iudicium  
auditoribus relinquit; rhetorica uero in id uehe-  
menter incumbit, ut auditoris ac iudicis animum  
commoueat, & impellat. His rationibus acce-  
dunt Aristotelis, & Platonis grauissima testimo-  
nia: Aristoteles enim in primo rhetorices ait, rhe-  
toricam particulam quandam, & imaginem esse  
dialecticæ; ac enthymemata, & probationes esse  
persuasionis corpus, in hisq; rhetoricam a dialecti-  
ca pendere; cetera uero, ut ad iram, aut odium,  
aut misericordiam iudicis animum commouere,  
extra causam esse, ac improbanda; simile est enim  
ac si quis regulam, qua in dirigenda materia uti  
debet, intorqueat, cum eam rectissimam esse opor-  
teat. Plato autem in Gorgia de rhetorica loquens  
inquit. Videtur mihi rhetorica studium esse quod-  
dam, non artificiosum quidem, sed sagacis animi,  
aptiq; natura, atq; potentis ad humanam consue-  
tudinem sibi conciliandam; appello autem sum-  
mam, caputq; eius, adulationem. contra uero dia-  
lecticam magnopere solet extollere, & in septimo  
de republica legem statuit, qua adolescentes eam  
potissimum disciplinam capeffere iubeantur, ex  
qua ad interrogandum, & respondendum, ut scien-  
tem decet, aptissimi sint. His itaque rationibus  
& testimonijs adducti dialecticam rhetoricæ præ-  
stare dicimus; neque ob id tamen rhetoricam



damnamus, aut contemnimus, quam esse præstantissimam, ac utilissimam artem, nisi quis ea abutatur, minime dubitamus. sed iam ne longius euagetur oratio, quæ reliqua sunt instituti nostri prosequamur.

Illud utro nobis superest, ut sophisticæ facultatis, quæ dialecticæ adnectitur, usum exponamus. Hanc igitur facultatem tractant philosophi, non ut captiosis, & fallacibus rationibus utantur; neque enim decet philosophum, & ueritatis amatorem aliquem fallere; sed ea ratione de his agunt, ut sophistas, qui eis utuntur, refellere ualeant, & cauillationes eorum dissoluere. quemadmodum, et medici de uenenis agunt, non ut ipsis utantur, sed ut eorum pestiferam uim arceant, aut depellant. Ac ut exemplis quibusdam huius etiam partis usum patefaciamus, si quis hoc modo nos deludat; Nullum animal, dum dormit, uigilat, omnis homo est animal, dum dormit, ergo nullus homo uigilat; aut si quis hoc modo argumentetur; Omne uniuersale est immortale, homo est quiddam uniuersale, ergo homo est immortalis, male igitur in definitione hominis dicitur, ipsum esse animal mortale. aut si quis nos ita circunueniat; omnis actus inseparabilis est ab eo, cuius est actus, anima est actus corporis, ergo est a corpore inseparabilis: primum quidem argumentum peccare dicemus, quod particula illa, dum dormit, ad maius extremum, non ad medium adiungenda est: secundum uero ex



eo vitiosum esse, quod singuli homines intereunt,  
natura humana non interit; ideoque verum est ho-  
minem esse mortalem, si singulos spectemus; &  
esse immortalem si communem naturam conside-  
mus: tertium adhibita distinctione dissoluemus;  
nam actus alius informat, qui est inseparabilis,  
alius assistit, qui est separabilis; talis autem est  
anima, non quidem omnis, sed rationalis.

Ex his quæ hactenus de Logices usu dicta sunt,  
corollarium hoc, ut Geometræ dicunt, elicere pos-  
sumus: scientias illas præclaras, & nobiles, nimi-  
rum philosophiam, medicinam, theologiam, &  
iuriprudenciam, Logica disciplina plurimum indi-  
gere. cum enim in omnibus, & res definire, & ge-  
nera dispartiri, & ambigua interpretari, & vera  
probare, ac falsa confutare, ac intelligere, quid  
quamque rem sequatur, & quid repugnet, præte-  
rea probabiliter, & acute disputare, & fallaces  
rationes soluere oporteat, Logicas illas methodos  
prius cognoscere operæpretium est. nisi quis ea  
pibilo secius sine arte, quàm ex arte, fieri posse opi-  
netur, quod tamen à veritate multum abesse iudi-  
cabit, si et citharam pulsari, & tabulas pingi, &  
ædes construere; aliaque omnia ex arte, melius, quàm  
sine arte fieri, cogitabit. Verum, ut corollarium  
hoc magis confirmetur, virorum sapientum testimo-  
nia quedam adducemus. Logicam igitur discipli-  
nam philosophiæ in primis conferre omni aßeuera-  
tione Peripatetici affirmant; quemadmodum enim

operariæ artes, suis instrumentis destitutæ, propria munia exercere nequeunt, sic philosophia sine Logica disciplina, quæ est eius instrumentum, finem suum assequi non potest; sed in multos errores necessario labitur; quare non est mirum, si ueteres scriptores huius artis ignari, in uarias posteriorum reprehensiones incurrerunt. Cum Peripateticis consentiunt Academici, qui differendi artem philosopho necessariam esse dicunt, ac esse diuinum donum per Prometheum una cum igne uobis datum: Vt enim ignis dissimilia diuidit, composita resoluit, simplicia definit, & cuncta luce sua demonstrat, præterea perspicua replet lumine, accendit sicca, & grauiâ tollit in sublime, ita Logica disciplina ea, quæ in contemplationem cadunt, diuidit, resoluit, definit, & demonstrat; præterea illuminat mentem, accendit uoluntatem, & utranque eleuat ad sublimia. Id ipsum comprobant Stoici, qui absque Logica disciplina sapientem dicunt sine lapsu non futurum; ex illa enim discerni uerum, & falsum; ac in dicendo acutum, ingeniosum, & cautum hominem reddi: & cum philosophiam animanti similem esse dicant, ossibus ac neruis Logicen, carnibus physicen, & animæ ethicen, conferunt, ipsam præterea Logicen inter uirtutes numerant Stoici; quod rationem habeat, ut Cicero inquit, ne cui falso assentiamur, ne ue unquã captiosa probabilitate fallamur; & ea quæ sentiamus, ut tenere tuerique possimus; nam sine hac arte

22  
quinis a uero abduci falli q̄; potest; recte igitur si  
omnibus in rebus temeritas, ignoratioque uitiosa  
est, ab his ea quæ tollit hæc uirtus nominata est.  
Sed Epicurum fortasse quispiam proferet, qui solus  
ex omnibus philosophis totam hanc artem, ut ad  
philosophandum inutilem, contempsit, & irrisit: at  
idem suæ temeritatis, & ignorantie grauissimas  
pœnas dedit, nam et in dicendo nulla ratione du-  
ctus frequentissime lapsus est; & sententias illas  
tueri uoluit, quæ non solum falsæ sunt, sed & ma-  
xime omnium detestabiles: diuinam enim proui-  
dentiam e rebus humanis sustulit; & summum  
bonum in uoluptate posuit: adeo Logicæ disciplinæ  
contemptus hunc hominem transuersum egit. Me-  
dicinæ autem Logicam disciplinam perutilem esse,  
constans est omnium sententia; quam & admira-  
bilis uir Galenus, & diuinus Plato grauissimi te-  
stes confirmant. Galenus enim in libro de consti-  
tutione artis medicæ, Necessarium esse inquit me-  
dico aliquam methodum, qua uerum a falso discer-  
nat, didicisse; neq; enim ad eorum inuentionem,  
quæ inquirenda proponuntur, satis fuerit, uerita-  
tis desiderio teneri, nisi etiam uiam aliquam eam  
inueniendi expeditam habeat; oportet insuper eam  
methodum ita assidua exercitatione tritam habe-  
re, ut non modo norit, sed uti etiam ualeat. Alibi  
etiam inquit: Medicum exerceri oportet, in ijs  
methodis Logicis, ad quas nunquā hortari desino,  
quasq; in demonstrationum commentarijs tradidi.

Plato autem in Phædro cum artes omnes nobiles inquit dialectica exercitatione indigere, id potissimum rhetoricæ, ac medicæ artis exemplo declarat. quamobrem non inepte sensit Fauentinus ille, qui cauendum esse dixit a medico Logices imperito. In sacris autem literis Logicam disciplinam magnum habere usum, Diuus Augustinus, & Diuus Hieronymus Locupletissimi sunt testes. Alter enim in libro de doctrina Christiana, ipsam, inquit, ad omnia genera quæstionum, quæ in literis sacris sunt, penetranda, & dissoluenda plurimum ualere: & alibi, scientia (inquit) conclusionum, & diuisionum, plurimum lectorem scripturarum adiuvat, tantum absit error, quo uidentur homines sibi ipsam beatæ uitæ ueritatem didicisse, cum ista didicerint. Hieronymus autem in commentarijs in Ezechielem; Vere (inquit) quicquid in seculo peruerforum dogmatum est, quicquid ad terrenam scientiam pertinet, & putatur esse robustum, hoc dialectica arte subuertitur, & instar incendij in cineres fauillasq; dissoluitur, ut probetur nihil, quod putabatur esse firmissimum. Verum & iurisprudentia Logicæ artis adiumento indiget: cum enim in hac, non minus quam in alijs, & docere, & disputare oporteat, Logicam disciplinam huius scientiæ, non minus quam alijs, usui esse necesse est: idque M. Fabius libro duodecimo suarum institutionum his uerbis comprobatur. Quæstio iuris omnis aut uerborum proprietate, aut æqui dispu-

tatione, aut uoluntatis coniectura continetur: quorum pars ad rationalem, pars ad moralem tractatum redundat: ergo natura permixta est omnibus istis oratio, quæ quidem oratio est uere; nam ignara quidem huiusce doctrinæ loquacitas erret necesse est, ut quæ uel nullos, uel falsos duces habeat. Hæc ille. Quod si uerum est, ut audio, iuris doctrinam confusam adhuc esse, & perturbatam, in hac etiam magis, quam in alijs Logica disciplina erit requirenda, nempe ad eam excolendam, & in methodum redigendam. quare si quis hac facultate probe instructus, & ornatus, in iuris etiam scientia summus existat, eximium certe quippiam, & præclarum efficere poterit. quod quidem, & Gulielmus Budæus in suis commentarijs in pandectas testatus est, & ex Marco Tullio facile cognoscere possumus: qui Seruium Sulpicium ob Logicæ artis peritiam cæteris omnibus in iuris scientia excelluisse commemorat. in libro enim de claris oratoribus, Sic (inquit) Brute existimo, iuris ciuilis magnum usum, & apud Scæuolam, & apud multos fuisse, artem in hoc uno, quod nunquam ef- fecisset ipsius iuris scientia, nisi eam præterea didicisset artem, quæ docet rem uniuersam tribuere in partes, latentem explicare definiendo, obscuram explanare interpretando, postremo habere regulam, qua uera, & falsa iudicarentur, & quæ quibus propositis essent, quæque non essent, consequentia: hic enim attulit hanc artem artium omnium

*maximam, quasi lucem ad ea, quæ confuse ab alijs  
aut respondebantur, aut agebantur. Hæc de Sulpi-  
cio M. Cicero. Quamobrem Logicam disciplinam  
ad iurisprudentiam, aliasq; præclaras scientias  
omnino adhibendam esse non iniuria concludere  
possumus. Qui igitur ea neglecta ad studia illa  
se se conferunt, similiter faciunt, ut si quis ad præ-  
lium committendum inermis progrediatur. Hæc  
enim sunt arma, quibus instructi studiosi, in gra-  
uioribus disciplinis, ueluti quodam militari cam-  
po pro ueritate pugnam incuntes, non temere, &  
imperite certantes cadunt, sed scienter, & ex ar-  
te pugnantes, errores, & difficultates, quibus ue-  
ritas obsidetur, & oppugnatur, tanquam hostiles  
copias, profligare possunt, & uictoriam consecu-  
ti, ueluti triumphantes, ad sapientiæ, & felicitatis  
arcem ea duce peruenire. Hic nos præfationis  
huius nostræ finem faciemus: iam enim qui nam  
sit Logices usus, quod ostendere institueramus,  
utcunque expositum esse arbitramur.*



*[The page contains faint, illegible handwriting, likely bleed-through from the reverse side.]*



## DE MATHEMATICARVM

RVM VSV

IN EVCLIDIS ELEMENTA

PRAEFATIO.



ÆPENVMERO mecum ipse cogitavi, quid sit, quòd cum hac tempestate plurimi doctrinarum studijs operam nauent, perpauci tamen ad eximiam illam ueterũ sapientiam, quam in græcis præsertim philosophis admiramur, propius accedant. Huius autem rei multas quidem causas afferri posse uideo: ut enim eas tantum, quæ magis promptæ & expositæ sunt, attingamus, complures dicent linguarum studia bonam nobis ætatis partem auferre, & ex turbidis riuulis, non ex puris fontibus doctrinam multos haurire, ac scientias olim maiori in honore, & pretio fuisse habitas, maioremque fuisse in literarum studijs ueterum industriam, ac sedulitatem. Sed his ego aliam causam potiore, ac ueriores existimo; quòd scilicet nunc mathematicæ disciplinæ ferè contemnantur. cum enim hæc mirum in modum ingenia studiosorum excuant, & omnibus disciplinis magno sint usui, atq; adiumento, cumq; a ueteribus studiosissime fuerint excultæ, nunc autem uulgo contemptæ iaceant, minime mirum uideri debet, magno nos ab illis

intervallo superari. si quis autem illud requirat, cur nunc homines neglectis mathematicis ad alias disciplinas sese transferant, non aliam opinor ueriores causam inueniet, quam quod earum usum non perspiciunt. Vt igitur quantum in nobis est, studiosæ iuuentuti consulamus, eamque ad optimarum disciplinarum studia concitemus, mathematicarum usum atque utilitatem hac nobis præfatione ostendere institutum est.

Vt igitur quod instituimus id commodius, & rectius prosequamur, hæc primum considerata nobis uidentur, quæ nam sit mathematica scientia, & in quas species distributa. Quæ sit igitur mathematica scientia perspicuum nobis fiet, si consideremus, eorum omnium, quæ in rerum natura sunt, alia materiæ prorsus esse coniuncta, quoniam scilicet & in ipsa materia sunt, & sine ipsa intelligi nequeunt, alia uero penitus esse a materia separata. prioris quidem generis sunt plantæ, & animalia, formæq; ac uires corporum naturalium; posterioris uero, diuinæ mentes, quibus cælestium orbium motionem tribuunt Peripatetici. Inter hæc autem media quædam intercedunt, quæ licet in materia sint, sine ipsa tamen perfectè cognoscuntur, ut triangulum, quadratum, circulus, aliæq; id genus formæ. Quemadmodum autem ea quæ sine materia intelligi nequeunt, ad naturalem philosophiam pertinent, quæ uero a materia sunt omnino seiuncta, ad diuinam, ita quæ sunt in-

ter hæc mediâ ad mathematicen referuntur. Itâ  
quidem ex rebus subiectis quænam sit mathema-  
tica scientia cognoscere possumus. Quoniam au-  
tem ex omnibus formis, quæ materiam habent, so-  
la quantitas sine materia intelligi potest, ideo  
mathematica disciplina quantitatem ipsam con-  
templatur: cuius duo sunt genera, alia enim est  
disiuncta, ut numerus, alia continens, ut linea, &  
superficies: ac continens quidem uel cum aliqua  
re coniuncta consideratur, uel absoluta: absolutam  
considerat Geometria, tam planam, quàm solidam,  
sed ei, quæ solidam contemplatur, proprium no-  
men nonnulli posuerunt, ac Stereometriam appel-  
larunt. Quæ autem est alicui rei coniuncta, aut  
cælesti corpori, aut ijs formis, quæ sub aspectum  
cadunt, coniuncta est, unde Astronomia, & Opti-  
ce, quæ Perspectiua dicitur, ortum habent. quòd  
si continens quantitas alijs præterea rebus coniun-  
cta mathematicè considerari potest, alias etiam  
huius generis scientias esse necesse est. Disiuncta  
etiam quantitas uel sono coniuncta consideratur,  
uel absoluta, absolutam considerat Arithmetica,  
coniunctam sono Musica. Hinc itaque prodeunt  
nobiles illæ disciplinae, Geometria, Arithmetica,  
Astronomia, Perspectiua, & Musica: quarum  
aliæ simplices mathematicæ sunt, aliæ naturalem  
considerationem participant; simplices quidem  
duæ sunt, Geometria, & Arithmetica, reliquæ  
uero naturalis considerationis participes sunt,

quantitatem enim alicui rei coniunctam contem-  
plantur. Cum hæc ita se habeant, de simplicibus  
tantum, nimirum Geometria, & Arithmetica, a  
nobis in præsentia agendum est: tum quòd de his  
tantum Euclides in elementis agit, tum quòd hæ  
simpliciter ac proprie mathematicæ dicuntur, atq;  
illæ sunt, quæ tanquam inutiles uulgo negligun-  
tur: harum igitur usum multiplicem exponere  
iam aggrediemur.

Multos quidem atque præclaros usus habent  
mathematicæ, nam & ipse per se multa præstant,  
& ad scientias, ad morales uirtutes, & ad artes,  
quæ tria sunt animi nostri lumina, atque orna-  
menta, perutiles sunt. Primum enim Geometria  
ad dimetiendos agros conducit, unde & nomen  
sortita est. Ab Aegyptijs autem ipsam primo fuisse  
inuentam multi memoriæ prodidere. Cum enim  
Nilus frequentibus alluionibus agrorum termi-  
nos confunderet, ut rursus distinguerentur, hac  
dimetiendi disciplina fuit opus. Quæ sane, præter  
quotidianum usum, magnas etiam calamitates in-  
terdum propulsauit. nam & Sesostris Aegyptio-  
rum rex, & Darius Persarum, mox & Ptolemæus  
eum secutus, sinum arabicum cum Nilo perducta  
fossa cõiunxissent, ui monuissent geometra, Aegy-  
ptum uniuersam a mari rubro, quod tribus cubi-  
tis altius comperissent, obrutum ac perditum iri.  
Sed tamen cum Archimedes uir ille admirabilis  
rationem inuenisset, qua inundatio uitaretur,  
eamque

eamq; tertio Ptolemæo ostendisset, id rex efficere propterea noluit, ne aditu tam opportuno patefacto prouinciam illam Persarum incursionibus exponeret. Sed & Demetrium regem nonnulli tradunt cum Isthmum corinthiacum, qui Aegeum mare ab Ionio dirimit, perfodere tentaret, a geometris fuisse deterritum; qui, si id fieret, magnam Peloponesi partem submersum iri docuerunt. Ex hoc autem initio Geometria ad altiora deinde contemplanda progressa est, ita quidem ut Plato in Epinomide ipsam ridiculè Geometriam appellari dixerit, quasi non nisi dimetiendis agris inserviat, nam ad demonstrationes conuersa, & triangulorum, & figurarum, quæ lineis parallelis continentur, proprietates considerat, & quomodo ad has aliæ rectilineæ reducantur, docet. tum & linearum uariè sectarum, et coniunctarum, triangulorumq; potestates perquirat, & quomodo ad quadratam formam ceteræ rectilineæ reducantur, tradit. præterea, & circulorum proprietates expendit, & uarias figurarum inscriptiones, & circumscriptiones. Rationum deinde, & proportionum naturam admirabilem contemplatur, sine quibus nihil omnino, aut ab arte, aut a natura rectè constitutum uidemus. Iam uero ad eas, quæ sunt in figuris proportionem sese transfert, ac uiam demonstrat, qua figuræ propositæ sint in alias conuertendæ, & quacumq; oportuerit ratione diuidendæ, augendæ, ac minuendæ. Ad eas postea magnitudines con-

12  
uertitur, quæ sunt numero inexplicabiles, ac irrationales dici solent, earumque naturas, & proprietates perscrutatur, quod Pythagoras primum fecisse fertur. Ad solida postremo sese transfert, nempe pyramides, prismata, sphaeras, cylindros, conos, cubos, eiusque generis alias: quorum constructiones, & inscriptiones, circumscriptiones, diuisiones, ac conuersiones perquirat. His autem instructa rationibus ad rerum dimensionem descendit, uariisque utens instrumentis, & rerum distantias, & altitudines, & planorum areas, & corporum cuiuscunque generis moles dimetitur: neque his terrenis contenta propriis confisa demonstrationibus ad caelestia conscendit, sed hac de re postea, nunc ad Arithmeticam conuertamur. Arithmetica quidem Geometriae finitima ad computandas rationes in primis confert, quæ quidem res in humana uita tam late patet, ut qui eius sit imperitus ne homo quidem dici mereatur, cum hoc potissimum homo, ut Plato dixit, a brutis animantibus differre cognoscatur, quod numerare sciat. Hæc apud Phœnices ortum habuisse fertur, quibus propter negotiationes, & commutationes, numerorum cognitio erat necessaria: sed ad altiora deinde progressa est, ad numerorum scilicet naturam, differentias, proprietates, proportionales, & potestates contemplandas. Hæc etiam ea, quæ Geometria pertractat, ad calculum redigit, atque adhibita numerorum luce patefacit, nec de his solum magnitudinibus agit,



quæ sunt numero explicabiles, sed, quod ualde mi-  
 randum est, de his etiam, quæ sunt inexplicabi-  
 les; occultis enim quibusdam numerorum radici-  
 bus utens, admirabilique artificio progrediens,  
 eas tandem in lucem profert. Nonnulli autem  
 numerorum scientiam multo latius patere putant;  
 Pythagorici enim rerum omnium principia nume-  
 ros esse arbitrantur, quos imitatus Plato, in Ti-  
 mæo quidem animæ substantiam numeris qui-  
 busdam harmonicis constare tradit, in Epinomide  
 uero magnis laudibus numerum ornât: Si quis,  
 inquit, quod diuinum in generatione, & quod mor-  
 tale est, inspexerit, is profecto inueniet nullum ua-  
 tem, quantæ uirtutis nobis causa numerus sit, com-  
 prehendere posse, nam & tota Musica motus, &  
 uocum numero indiget, & quod maximum est, bo-  
 norum quidem omnium, mali uero nullius causa  
 est numerus; quod hinc facile cognoscere possu-  
 mus, quod rationis expers, inordinata, deformis,  
 inepta, inconcinnaq; agitatio, omne denique, in  
 quo mali quippiam inest, omni numero caret. Hæc  
 ibi. Alibi uero mentem ab unitate, rationem a  
 binario, opinionem a ternario, sensum a quater-  
 nario manare docuit; & animam corpori nume-  
 ris quibusdam alligatam esse prodidit. Aristoteles  
 uero colores omnes in numeris esse tradit, & ob  
 uarias eorum, quæ miscentur, proportionēs, mul-  
 tas eorum species existere, ut enim tria ad duo,  
 ac ut tria ad quatuor, & secundum alios numeros

54  
misceri inter se possunt, quod quidem de alijs naturalibus formis, non minus quàm de coloribus, dici potest. Solent etiam Peripatetici rerum species cum numeris conferre, quod magnam cū ipsis habeant naturæ affinitatem, sed hæc in præsentia omittamus, & cum iam ostensum sit quid per se præstent mathematicæ, quid etiam ad alia nobis profint ostendamus.

Primum quidem disciplinis uniuersis magnum afferunt emolumentum, nam & ingenia discentiū explorant, sint ne ad scientias percipiendas accommodata: quo circa uere admodum dictum uidetur; Vt aurum probatur igne, ita ingenium mathematicis: Et si discantis ingenium habetius fuerit, ipsum exaltant, & ad omnem contemplationem aptissimum reddunt. quod quidem in septimo de Rep. Plato de Arithmetica his uerbis confirmat. An & hoc aduertisti, quod homines arithmetici ad omnes doctrinas acuti uidentur? quinetiam si qui ingenio tardiores huic se studio dederint, si nullam utilitatem aliam susceperint, tamen hoc assequuntur, ut acutiores quam antea sint. Ac paulopost de Geometria inquit. Scito præterea ad disciplinas omnes facilius perdiscendas interesse omnino, attigerit ne aliquis Geometriam, an non. Hæc ille. Huc accedit quod mathematicæ, & ex uocum consideratione ad rerum contemplationem animum reuocant, & ueritatem ipsam a nobis percipi clarissime ostendunt, eiusque

amorem quendam mirabilem animis imprimunt, quamobrem, & ijs ualde profunt, qui ex linguarum studio sese transferunt ad eas doctrinas, quæ in rerum contemplatione uersantur, & eorum animos confirmant, qui incertis opinionibus ueluti fluctibus agitati, aut nullam esse in rebus ueritatem, aut eam a nobis percipi non posse putant. Præterea cum in mathematicis firmissimæ sint demonstrationes, ordoq; & series admirabilis, & doctrina exquisitissima; nos assuescunt, ut probabilibus rationibus non multum fidamus, sed demonstrationes, quantum fieri potest, inquiramus; similemque in alijs etiam rebus ordinem, ac doctrinam feruamus. His quidem rationibus mathematicæ uniuerso disciplinarum generi conducunt, quamobrem Galenus rectissime, in libro de artis medicæ constitutione, inter ea quæ concurrere est opus, ut quis eorum, quæ inquisiuerit, ueritatem inueniat, mathematicam exercitationem connumerat. Primum, inquit, natura perspicax, ut edoctus facile quancunq; rationalem disciplinam consequatur, alterum educatio a teneris annis in primis disciplinis, præcipue uero in Arithmetica, & Geometria, quemadmodum & Plato suadet, ipsum exerceri oportet.

Speciatim uero Geometria, & Arithmetica ad alias mathematicas, ad Logicam disciplinam, ad philosophiam, & naturalem, et diuinam, deinde ad morales uirtutes, & ad artes prope omnes uti-

les sunt. Ad alias quidem mathematicas, ut Astro-  
nomiam, Perspectiuam, & Musicam, non aliter  
conferunt, quam ad legendum, scribendum ue ele-  
mentorum cognitio. Astronomia enim complura  
circa stellarum ortus, & occasus, & errantium  
cursus uarios, atque admirabiles; & cæli stelliferi  
motum primo contrarium, ex Geometriæ decretis  
demonstrat. huius auxilio stellarum altitudinem,  
& interualla, Lunæ ac Solis defectus, magnitu-  
dinem, & a centro terræ distantiam, aliaq; multa  
maxime admirabilia perquisiuit. quæ quidem res  
non solum Geometriæ usum, sed etiam humanæ  
mentis præstantiam, ac diuinitatem possunt aper-  
tissime nobis ostendere. Neq; minus quæ in Geo-  
metria demonstrantur ad ea, quæ in Optice tradun-  
tur, utilia sunt, ut frustra omnino qui Geometriæ  
sit expers ad has scientias sese conuertat. Verum,  
& ad alias quasdam scientias, quæ mathematici  
generis sunt, Geometriæ usus diffunditur, ut ad  
Geographiam, Gnomonicon, Mechanicon, scientiam  
ponderum, & eorum, quæ in aqua insident, doctri-  
nam; omnes enim Geometriæ decretis tanquam fun-  
damenti inuituntur. Quamobrem qui Geometriam  
contemnunt, si non aliud detrimentum accipiant, his  
certe omnibus disciplinis excluduntur, quæ magnam  
sane utilitatem cum summa delectatione coniun-  
ctam habent. Quantum autem Arithmetica non  
solum Musicæ, ad eius theorematum demonstranda,  
sed etiam Astronomiæ, ad cælestes motus compu-

tandos, & Geographiæ, ad locorum intervalla inuestiganda, ac Gnomonica, ad horologiorum tabulas conficiendas, necessaria sit, illi probe norunt, qui suam in his rebus operam aliquando posuerunt: illudq; facile testari possunt, absq; Arithmetica nullam earum posse consistere.

Ad Logicam uero disciplinam mathematicæ præcipua quadam, & singulæ ratione pertinent. hæc enim de demonstratione potissimum agit, cuius naturam, principia, proprietates, & differentias contemplatur, legesq; tradit; & præcepta; mathematicæ uero demonstrationes conficiunt exquisitissimas, eorumq; omnium, quæ de ipsa demonstratione traduntur, exempla clarissima suppeditant. Quo fit ut qui mathematicum periti sunt, cum ad Logica theoremata sese transferunt, ea omnia, quorum iam usum tenent, optime, facillimeque percipiant; eius uero discipline rudes, cum earum rerum expressas effigies nullas teneant, umbras & imagines conspiciantur necesse est. Quamobrem qui præstantissimam illam demonstrandi methodum assequi cupiunt, ut mathematicis instituatur operæpretium est. Quod ut confirmetur magis, Galeui hac de re testimonium locupletissimum asferre libet: qui in commentario de proprijs libris, ut nos conuertimus, ita scribit. Cum multos uiderem, qui in propositis disceptationibus se demonstrare pollicerentur, & eos, qui sententiam tenerent aduersam, redarguerem, nihil rerum omnium, æque ac me-

thodum demonstrandi, addiscere studui. Quæsiui  
igitur a philosophis, ipsos enim audiueram eam do-  
cere, quenam esset ea methodus, qua instructus  
quispiam rationem illam, quæ demonstratiua dica-  
tur, possit exquisitè cognoscere, uere ne demonstra-  
tiua sit, an solum appareat, sitq; nummo adulte-  
rino similis; & qua possit ipse demonstratiua ra-  
tione usus, ad eorum, quæ inquiruntur, inuentio-  
nem peruenire. omnes igitur illius temporis illu-  
stres philosophos, Stoicos, & Peripateticos audiui:  
a quibus multa quidem Logica theorematà didici,  
quæ postero tempore cōsiderans inutilia ad demon-  
strationes esse deprehendi; pauca autem quædam  
utiliter quidem inuenta, et quæ ad propositum sco-  
pum spectare uiderentur; sed hæc erant inter se  
discrepantia, & quædam naturalibus etiam notio-  
nibus repugnantia. Ac per Deos quidem ex præ-  
ceptorum opera in Pyrrhonias hæitationes ipse  
quoque incidissem, ac nullam esse in rebus ueritatē  
existimasset, nisi ad Geometriam, & Arithmeti-  
cam me ipsum conuertissem, quibus, ab auo etiam  
proauoq; traditis, cum puer essem, a patre pluri-  
mum fueram institutus. Videns itaq; perspicuè  
uera esse, quæ in his scientijs demonstrabantur,  
satius esse duxi Geometricum modum in demon-  
strando imitari: nam et ipsos dialecticos, & phi-  
losophos non modo inter se, sed etiam ipsos a se-  
metipsis, dissentientes inueni: cum tamen omnes  
Geometricas demonstrationes æque laudarent.



qua ratione magis etiam cognoui ab eorum quidem dictis esse discendum, mathematicarum uero demonstrationum exemplar sequendum. Quicumque igitur demonstrationis doctrinam assequi cupiunt, eis quidem suadeo, ut in mathematicis erudiantur, in illisq; demonstrationibus exerceantur, post illas uero commentationes nostras de demonstratione cognoscant, quas quindecim libris complexi sumus. Hæc Galenus. ex quibus quantum mathematicæ ad Logicam disciplinam fructum afferant, ita perspicuum est, ut alijs præterea uerbis ad hoc ostendendum opus esse non putemus.

Verum & in naturali philosophia mathematicæ magno usui sunt: cum enim res naturales symmetria quadam mirabili constructæ sint, siue elementorum mixturem, siue partium uel uniformium, uel multiformium compositionem spectemus, scientia illa, quæ symmetrias contemplatur, ad earum perceptionem magnopere prodesse potest. Quamobrem mirum non est Pythagoricos res naturales ad mathematicas rationes deduxisse: quod quidem, & Timæus Locrus fecit, mathematicis nominibus rerum naturalium contemplationem explicans, ac elementorum generationes, numeris, & figuris exornans, eorumq; potestates, actiones, & perpeffiones in ea referens, angulorumq; acumina, & obtusitates, laterumq; lenitates, & asperitates, multitudinemq; , & paucitatem elementorum, cuiusq; mutationis causam assignans. Cum ijs

74  
 etiam consentiens Plato principia constituentia  
 elementa posuit duo triangulorum genera, rectum  
 angulum habentia, alterum ἰσοσκελὲς, quadra-  
 ti dimidium, alterum σκαλὲν, trianguli æqua-  
 lia habentis latera dimidium, cuius latus longius  
 est breuioris potentia triplum, mediū uero sesqui-  
 alterum, quæ quidem potentia non quadratorum,  
 ut sæpe alias; sed angulorum; quibus latera obij-  
 ciuntur, ratione, intelligenda est. Ex his triangu-  
 lis docet quatuor illa solida constitui, cubum, py-  
 ramidem, ὀκτάεδρον, & ἰκosaεδρον. ex primo  
 quidem triangulorum genere cubum, ex altero  
 cætera, ac cubum quidem terræ tribuit, quod fir-  
 missimas, tutissimasq; possideat bases, pyramidem  
 igni, quod sit acutissima, & ad incisionem aptis-  
 sima, omniumq; leuissima, nimirum ex pauciori-  
 bus triangulis, constituta: ὀκτάεδρον aeri, quod  
 ad pyramidis naturam proxime accedat: ἰκosaέ-  
 δρον aquæ, quod infirmissimas habeat bases, &  
 aquæ fluxionem, repræsentet. quintum autem  
 corpus, nempe δωδεκάεδρον, quod duodecim fa-  
 cies habeat, & ex alijs principijs constitutum est,  
 congruere putat cælo, quod totum in duodecim  
 signa distributum est, neque potest ob naturæ diuer-  
 sitatem cum quatuor illis elementis commutari.  
 Multa præterea de rebus naturalibus ex mathe-  
 maticis decretis Platonici ratiocinantur. Sed &  
 Peripateticorum doctrina, quæ his de rebus exqui-  
 sita magis esse censetur, mathematicis indiget.

*sextus enim liber naturalis auditionis ab harum  
 disciplinarum imperito uix intelligetur : neque  
 septimus liber absq; notitia proportionum intelligi  
 potest : in libris etiam de cælo multa Aristoteles  
 demonstrat , quæ mathematicam institutionem  
 requirunt, & tertius liber meteorologicus Geome-  
 tria, & Optice plurimum indiget . Mathematica  
 deinde exempla, quibus Aristotelis scripta referta  
 sunt , apertissime indicant , philosophum hunc suo-  
 rum operum studiosos mathematicis eruditos re-  
 quirere , atq; deposcere . Mitto nunc quod ipse  
 perpetuo, & sua probando , & aliena refellendo ,  
 accuratum illud mathematicorum dicendi genus  
 redolet . Hæc quidem græci Aristotelis interpre-  
 tes optimo sane testimonij genere comprobarunt ;  
 fuerunt enim (id quod eorum doctissimæ explica-  
 tiones testantur) in mathematicis admodum eru-  
 diti . Ad illud præterea mathematicæ proficere ,  
 & ualere possunt , ut res naturales simili ratione,  
 & uia tradantur , cuius sane rei pulcherrimum  
 exemplum nobis edidit Proclus, qui mathematicos  
 imitatus, duobus libris, quos nos latinos fecimus ,  
 præcipua quadam scientiæ naturalis theoremata  
 tam præclare persecutus est , ut hoc exemplo stu-  
 diosos excitare, & in magnam spem , magnumque  
 desiderium eius scientiæ adipiscendæ adducere fa-  
 cile possit .*

*Ad eam præterea philosophiæ partem, quæ pri-  
 ma , & diuina , & μετὰ τὰ φυσικά dicitur, ma-*

themática conferunt : cum enim in  $\eta\varsigma$  uersentur ,  
quæ licet existant in materia, absque materia ta-  
men intelliguntur, ad eorum contemplationem ani-  
mum præparant , quæ a materia prorsus seiuncta  
sunt , qualia nimirum sunt ea , quæ prima con-  
templatur philosophia . si enim corporeis rebus as-  
sueti ad diuina illa statim accedamus , quæ a ma-  
teria sunt omnino separata , molem , & figuram ,  
ac motum ipsis tribuamus , & in ea maxima luce  
cæcutiētes perinde aberrabimus, ac si quis ex obscu-  
rissimo carcere ad clarissimam lucem transfera-  
tur . sed mathematicæ nobis usui ueniunt, quæ men-  
tis oculos præparant, ac sunt ueluti scalæ, quibus  
ad diuina percipienda conscendimus . Recte igitur  
dicebat Plotinus , humanam mentem mathemati-  
cis indigere, ut incorporeæ naturæ assuescat, cumq;  
in his sese exercuerit , ad primæ philosophiæ ratio-  
nes , & ad rerum , quæ uerè sunt , contemplatio-  
nem, esse deducendum . Timæus etiam mathema-  
tum cognitionem uiam ad primam philosophiam  
esse dixit, quoniam animum ad incorporeæ substan-  
tiæ perceptionem præparat . Et Plato in septimo  
de Rep. mathematicas asserit ad ipsarum rerum  
essentiam contemplandam nos ducere , animumq;  
ad eius , quod uerè est , cognitionem attollere . De  
Arithmetica enim inquit . Videtur ex eorum nu-  
mero esse, quæ ad intelligentiam homines eleuant,  
qualia nos perquirimus: cumq; talis sit, ut omnino  
mentem ad essentiam possit attollere, nemo, ut de-

cet, hac uti cognitione uidetur. De Geometria uero inquit. Ergo si essentiam intueri Geometriae studium cogit, conuenit quidem, sin autem generationem, non conuenit: ita dicimus. An non id quoque nobis est concedendum, quod quaeritur cognoscendi illius gratia, quod semper est, non eius quod & oritur quandoq; , & interit? concedendum plane. nam Geometria eius, quod est semper, cognitio est. Attollet igitur ò generose ad ueritatem animum, atq; ita ad philosophandum praeparabit cognitionem, ut ad supera conuertamus, quae nunc, contra quam decet, ad inferiora deiicimus. Quam maxime igitur praecipendum est, ut qui praeclearissimam hanc habitant ciuitatem, nullo modo Geometriam spernant, Hæc ibi. Paulopost uero inquit, Nempe uereri uideris ne multi te putent inutiles disciplinas inducere, est autem non leue istud sed difficile admodum persuadere, quod ex huiusmodi disciplinis instrumentum quoddam cuiusq; animi expurgatur, reuiuiscitq; , quod ante ex alijs studijs infectum, occacatumq; fuerat, cum potius id seruandum sit, quam oculorum corporis. decem millia, solo enim hoc inspicitur ueritas.

Ex his quæ hætenus dicta sunt, Geometriam, & Arithmeticam scientijs omnibus magnas utilitates asferre manifestum est. Quamobrem non inepte quidam scientias omnes, suis locis apte dispositas, pulcherrimo quodam munitissimoq; oppido conclusas finxerunt, eiusq; aditum Philospho





ac uirtutis fundamentum est maximum. Deinde  
qui proportionum naturam admirabilem cognos-  
cit, ad iustitiam amandam, & prosequendam,  
quæ in proportionem quadam consistit, animum in-  
ducit: ut enim in sexto de Rep. inquit Plato, non  
solum probabile est, sed penitus necessarium, eum,  
qui erga aliquid amore afficitur, quicquid cognatum  
& familiare est amato, diligere. Iustitiam autem  
in proportionem quadam consistere, in quinto de mo-  
ribus ad Nicomachum Aristoteles docet. Cum  
enim Iustitia in duas partes secetur, atque earum  
una in iniurijs emendandis, altera in muneribus  
distribuendis uersetur, illam quidem in Arithme-  
tica proportionem, hanc uero in Geometrica consi-  
stere ostendit, illam in continente, quæ in tribus  
terminis existit, hanc in disiecta, quæ quatuor  
semper terminos requirit. tres quidem termini, in  
quibus illa uersatur, sunt, is, qui iniuriam intulit,  
is cui illata est, & index, qui inter illos est me-  
dius. quoniam enim qui iniuriam intulit plus bo-  
ni sibi uendicauit, & ei, qui iniuria affectus est,  
minus est boni, ideo index alteri quidem de-  
trahens alteri uero adiciens eos ad æqualitatem  
restituit, ueluti linea quadam in duas partes  
inæquales secta si quis id, quo maior pars dimi-  
diam superat, hoc de illa detrahat, & ad minorem  
partem addat, eas ad æqualitatem reducet. Qua-  
tuor autem termini, in quibus altera iustitiæ spe-  
cies uersatur, sunt duo homines, ac duo munera

81.  
illis tribuenda. itaq; se habere debet munus ad  
munus, ut homo ad hominem: quæ proportio nisi  
seruetur, neque iustitia seruabitur. Hic autem  
alterna etiam, & composita proportio reperitur:  
alterna quidem, quoniam si ita se habet munus ad  
munus, ut homo ad hominem, ita quoq; munus ad  
hominem, se habebit, ut munus ad hominem. Ve-  
luti si decem talenta ad quatuor ita se habent, ut  
Achilles ad Aiace, ita quoq; congruent decem  
talenta Achilli, ut quatuor Aiaci: composita uo-  
ro, quoniam si ita se habet munus ad munus, ut  
homo ad hominem, ita quoq; homo affectus mune-  
re ad hominem affectum munere se habebit, ut ho-  
mo ad hominem. Veluti si decem talenta ad qua-  
tuor ita se habent, ut Achilles ad Aiace, Achil-  
les etiam decem talentis donatus ad Aiace qua-  
tuor talentis donatum ita se habebit, ut Achilles  
ad Aiace. Vtraq; igitur iustitiæ species in pro-  
portione quadam uersatur. Sed & temperantiam  
in proportione quadam consistere in quarto libro  
de Rep. ostendit Plato, ubi ipsam concentui, &  
harmonia similem esse dicit: quomobrem Socrates  
in Gorgia Calliclem accusat, quod ex contemptu  
Geometriæ temperantiam, & iustitiam non agno-  
sceret. Ad hæc qui rationis præstantiam in altis-  
simis illis rebus perscrutandis animaduertit, quan-  
tum ipsa appetenti facultati antecellat, facile co-  
gnoscat: quare sedulo adnitetur, ut ratio appetitum  
regat, ac secum rapiat, id quod non aliter secun-  
dum

dum naturam est, quàm in cælestibus motionibus a superiori sphaera inferiorem rapi, quemadmodum rationem ab appetitu rapi similiter est. præter naturam, ac si superior sphaera ab inferiori raperetur. Postremo cum mathematicum studia incredibili quadam delectatione, & uoluptate studiosorum animos detineant, discendiq; desiderium mirabiliter excitent, nihil erit fortasse quod ingenuorum adolescentum animos magis ad studia literarum, ad uirtutes, honestasq; actiones excitare possit, atq; inflammare.

Non solum autem ad scientias, & ad uirtutes, ut iam ostendimus, uerum & ad artes humanæ uitæ necessarias mathematicæ utiles sunt. in primis uero ad Architecturam, artesq; omnes operarias, deinde ad præstantiores illas, Rei militaris disciplinam, Dicendi facultatem, Iurisprudentiam, & Medicinam. Ad Architecturam quidem, ut ædificiorum figuræ recte describantur, & disponantur, eorumque partes omnes decentem habeant symmetriam; quæ quidem res ad ædificia tum construenda, tum ornanda, plurimū profunt; nam & columnæ, & spiræ, & stylobatæ, & capitula, & quæ super ipsa sunt, epistylia, siue Ionici, siue Corinthij, siue Tuscanici, generis sint, Geometricis omnia rationibus constant; multaq; in dies Architecto contingunt, in quibus explicandis mathematicis rationibus & methodis indiget. comprobatur hoc primarius ille scriptor Archite-

*Eturæ Vitruuius, cum Architectum suum mathe-*  
*maticis, quas huic arti multa præsidia præstare*  
*testatur, eruditum omnino requirat. Neq; solum*  
*in his caducis ædificijs construendis mathematica-*  
*rum usum extarc dicimus, sed etiam hanc admi-*  
*rabilem mundi molem tanto tamq; immenso arti-*  
*ficio constructam contemplantes, Deum optimum*  
*maximum in ea ædificanda mathematicis rationi-*  
*bus usum fuisse conijcimus; præsertim cum apud*  
*sapientissimum Solomonem legamus, mensura, nu-*  
*mero, & pondere, cuncta ab eo fuisse disposita. sed*  
*& animam mathematicis quibusdam rationibus a*  
*Deo productam fuisse a Platone in Timæo traditū*  
*est. Fabriles autem artes mathematicis indigere,*  
*ex eo cognosci potest, quòd artifices musicorum in-*  
*strumentorū, nisi mathematicas rationes teneant,*  
*temere ac sæpenumero perperam mensuras diui-*  
*dunt: quodq; fabri horologiorum, quæ aut solari-*  
*bus radijs obijciuntur, aut ponderibus appensis,*  
*uel forcipibus inclusis, admirabili cidentur motu,*  
*temporumq; intervalla distinguunt, sine harum*  
*disciplinarum præceptis nihil recte possunt effice-*  
*re. Iis præterea, qui stateras, & libras, & sac-*  
*mata inter se congruentia conficiunt, ac fabris de-*  
*nique omnibus, in quavis materia uersentur, ma-*  
*thematicæ prodesse plurimum possunt. Quid au-*  
*tem elegantiores illas pingendi, & sculpendi artes*  
*commemorem, quæ totæ in symmetrijs uersantur,*  
*& ab ipsâ Geometria tanquam filix uidentur esse.*

prognata? Profecto si has omnes artes contem-  
mur, ipsas nihil aliud, quàm Geometriam ad ma-  
teriam applicatam, esse iudicabimus.

In Rei uero militaris disciplina maximus ma-  
thematicarum usus existit. primo quidem ut acies  
quacunque forma, siue quadrata, siue cuneata,  
siue serrata, siue alia qualibet, instruatur; ac ubi  
sit opus promptissime transformetur; ea uero, cum  
est dimicandum, forma eligatur, quæ hostilem  
aciem infringere ac dissipare ualeat. Deinde ut  
locorum distantia, fluminum latitudines, montium  
ac turrium altitudines, facillime cognoscantur:  
utque regiones, & urbes, & alia qualibet loca,  
recte describantur: tum ut machinæ, quarum est  
usus aut in itinere, aut ad propugnandum, oppu-  
gnandumue, recta ratione construuntur; ac tormen-  
torum uis uniuersa præcipue cognoscatur. Præterea  
ad castra ponenda, urbesq; muniendas plurimum  
profunt; ut scilicet uniuersus ambitus probe consi-  
stat, eiusq; membra nimirum propugnacula, &  
optimam habeant formam, & opportunis locis  
collocentur: siue ea sint eminentia, quæ hostem ac-  
cedentem arcent, siue prominentia, quæ in angulis,  
siue depressa, quæ in lateribus collocantur, & ho-  
stem inuadentem deturbant, & dissipant. Quâmo-  
brem ad rei bellicæ opera mathematicæ magno cer-  
te possunt esse adiumento. Hæc autem Platonis  
testimonio confirmari possunt, qui in septimo de  
Rep. inquit. Quatenus enim Geometria ad bellicā

rem confert, eatenus certe nobis conuenit, nam ad castra ponenda, regionem occupandam, colligendas turmas, uel etiam spargendas, & ad cætera machinamenta, quibus circa acies, uel in obsidione, uel in itinere uti solent, permultum interest, Geometricus ne sit aliquis, an non. Quantum uero ad urbium defensionem Geometria prodesse possit, Archimedis exemplo licet cognoscere: qui suis machinationibus syracusanam urbem defendens, & Marcelli maximum apparatus frustrari, & Romani exercitus uires infringere potuit. Quapropter Marcellus, cum aduersum Deos pugnare uideretur, simul fugiens, & suos ludens pungensq; fabros, & machinatores, Non desistemus, inquit, contra hunc Geometram pugnare Briareum? qui sedens in litore, per lusum, nostras naues cum ingenti disiecit ignominia, ipsos uero fabularum centimanos superat, tot nos telis uno petens ictu. Hic est ille admirabilis Geometra, qui artis potentia confusus ad regem Hieronem scripsit, Quoduis onus quibuslibet moueri posse uiribus; atq; asserere non dubitauit, si alteram haberet terram, hanc ad illam se adaكتورum. Cuius rei tam incredibilis quasi specimen dedit, cum nauem onerariam, quæ ab ingenti hominum manu uix trahebatur, magno pondere imposito, procul sedens, nullo corporis nixu, quieta impellens manu, tranquille, planeq; ueluti mari perlaberetur, adduxit. sed nostrum institutum prosequamur, & oratoriae facultati mathe-



*matics usui esse deinceps ostendamus.*

Cum eloquentiæ præcipua vis in probationibus consistat, quod in rhetoricis ab Aristotele ostensum est, ad id multum orator adniti debet, ut rationes, & argumenta, quibus utitur, plurimum habeant firmitatis, & roboris; id autem non alia sane ratione magis assequetur, quàm mathematicarum imitatione, quæ primum inter omnes disciplinas obtinent firmitatis gradum. Deinde cum oratori de lineis, & angulis, areis & figuris, earumque dimensionibus, et mensuris differendum sit (de his etenim frequenter sunt lites) nisi et proprias rationes afferat, proprijsq; uocibus utatur, imperitus censebitur. sed Marcum Fabium audiamus, qui primo libro suarum institutionum hac de re præclare differit. Non sine causa, inquit, summi uiri etiam impensam huic scientiæ operam dederunt, nam cum sit mathematica diuisa in numeros, atq; formas, numerorum quidem notitia non oratori modo, sed cuicunque primis saltem literis erudito, necessaria est. In causis uero uel frequentissime uersari solet, in quibus actor non dico si circa summas trepidat, sed si digitorum saltem incerto aut indecoro gestu a computatione dissentit, iudicatur indoctus. illa uero linearis ratio cadit, & ipsa quidem frequenter in causas, nam de terminis mensurisq; sunt lites, sed habet maiorem quandam aliam cum arte oratoria cognationem. Iam primum ordo est Geometriæ necessarius, non ne, et elo-

quentiæ? ex prioribus Geometria probat insequen-  
tia, ex certis incerta, non ne id in dicendo facimus?  
denique probationum, quæ sunt potentissimæ, li-  
nearæ demonstrationes uulgo dicuntur, Quid au-  
tem magis oratio quàm probationem petit? Hæc  
ille.

Iam illud reliquum est, ut ad Iurisprudentiam  
quoq; et Medicinam mathematicarum usum per-  
tinere ostendamus. Ac in primis rationes illæ  
spectandæ sunt, quibus ipsas uniuerso disciplinarū  
generi prodesse ostendimus, quoniam scilicet inge-  
nia discipulorum explorant, & exacuunt, rerum ue-  
ritatem perspicue ostendunt a nobis percipi, ordi-  
ne admirabili, firmisimisque rationibus utuntur,  
ut nullum prorsus exemplum tradendæ doctrinæ  
præstantius esse possit. sed neque propriæ quædam  
rationes desunt. Iuris enim prudentiæ profunt,  
quoniam præcipuum legum fundamentum iustitia  
est, quæ in proportionem quadā consistit, in Arithme-  
tica quidem, ea quæ in emendando, in Geometrica  
uero, ea quæ in distribuendo uersatur. Quamobrem  
recte Pythagorici iustitiā octonario numero tan-  
quam eius pulcherrimo simulachro significabant.  
Hic enim numerus, quod cubus est, solidum iustitiæ  
fundamentum exprimit; quod uero est pariter par,  
æqualitatem illam Arithmetica declarat, quæ  
in commertijs adhibenda est; sic enim in bis qua-  
tuor soluitur, ut etiam in numeros æque pares di-  
uisio ipsa procedat, nimirum in bis duos, & qua

æqualitate dissoluitur, eadem quoque componitur,  
 cum bis duo bis octonarium constituent. Quod  
 deinde ad quaternarium eam rationem habet, quā  
 hic ad binarium, Geometricam illam proportio-  
 nem ostendit, qua in ciuitate pro meritis honores  
 & premia distribuuntur. Quapropter, & Or-  
 pheum per octonarium numerum iurare solitum  
 ferunt, si quando diuinæ iustitiæ testimonium af-  
 ferendum esset: Et apud Aegyptios iustitia octo-  
 nario numero inscripto designabatur: & celestium  
 orbium iustitiam sphaeris octo constare antiqui om-  
 nes arbitrati sunt. Ad hæc accedit, quod multa  
 in legibus sancita sunt, quæ Geometriæ cognitionem  
 requirunt; ueluti quæ de fluuiorum insulis, & eo-  
 rum alueis inter uicinos diuidendis pertractan-  
 tur: quam materiam Bartholus in sua Tiberiade  
 multis adhibitis figuris Geometricis est persecu-  
 tus; sed interdum, ut eius artis non admodum pe-  
 ritus, in rebus illis explicandis est lapsus, quod ian-  
 dudum a Ioanne Buteone Delphinate ostensum est.  
 Nec minus in partitione hæreditaria crebro est  
 opus Arithmetica; uelut in ea de qua in digestis,  
 Titulo, De liberis, et posthumis, Leges, si ita scriptum,  
 qua diuisio hæreditatis traditur, ubi post mortem  
 patris mater geminos parit, cum pater ipse solum  
 statuerit, quid agendum esset, si filius aut filia  
 nasceretur: Et Titulo, ad legem falcidiam, lege,  
 Qui quadringenta, ubi statuitur: Cum testator  
 omnia bona sua in legata distribuit, aliud statim

dandum, aliud post tempus aliquod, quomodo legis  
falcidiæ sit habenda ratio, quæ statuit, quartam  
partem bonorum, eiusq; fructus heredi deberi. Et  
Titulo, Soluta matrimonio, Lege Diuortio, qua fru-  
ctuum dotalium diuisiones post diuortium facien-  
dæ pertractantur. In his autem alijsq; huiusmo-  
di ueteres quidem legislatores mathematicum fuisse  
peritissimos apparet, legum uero interpretes harû  
disciplinarum rudes minus recte interdum eorum  
mentem explicasse minime mirum est.

Verum & Medicinæ magno sunt usui mathe-  
maticæ; quoniam & Logica disciplina, & natura-  
li philosophia, ipsam indigere constat, illas uero ut  
ante ostendimus mathematicis. sed ad corporum  
etiam dissectionem conferre possunt; diligentius  
enim uir mathematicus, & singula dissecabit, &  
partium omnium situm, figuram, superficiem, cõ-  
tactum, connexum, & constructionem obserua-  
bit. Deinde & corporum temperamenta, quæ a  
medico diligentissime cognoscenda sunt, & sanitas,  
quæ est eius finis, & robur, & pulchritudo, quæ ab  
eius consideratione aliena non sunt, in symmetria  
quadam omnia consistunt: nam cum in humano  
corpore sint elementa, & membra, cum similium,  
tum dissimilium partium, in elementorum quidem  
symmetria sanitas, in membrorum symmetria, quæ  
sunt similium partium, robur, in eorum uero, quæ  
dissimilium, pulchritudo consistit. Quinetiam me-  
dicamentorum compositio pars artis utilissima

nihil aliud fere magis requirit, quàm simplicium  
medicamentorum symmetriam. sed quis magno  
Hippocrati non credat, qui ad Tessalum filium  
suum scribens ita inquit. Ad cognoscendam Geo-  
metriam, & numerorum scientiam mi fili multum  
studij adhibeto; non enim solum uitam tuam illu-  
strem, et ad multa commodam in humanarum re-  
rum statu efficient, sed etiam animum acutiorē,  
& clariorem reddent ad omnium, quorum usus in  
medicina expetitur, utilitatem consequendam.

Iam igitur ex his quæ dicta sunt mathematica-  
rum usum patere existimamus; quem si quis sibi  
paucis exponi postulet, ad omnia quæ ab homine  
possunt intelligi, aut agi, aut effici, utiles esse ma-  
thematicas dicemus. Quamobrem non iniuria ue-  
teres græci homines prudentissimi has disciplinas  
tam auide sunt amplexi, ut nullus eruditus puta-  
retur, qui mathematicis non esset imbutus; tãtoq;  
studio prosecuti, ut eas nobis ornatissimas, admi-  
rabiliq; serie ac diligentia traditas reliquerint.  
quare mirum non est, Aristippam philosophum  
Geometricas figuras hominum uestigia appellasse:  
cum enim naufragio ad Rhodiensium, siue ut alij  
scribunt, ad Syracusanum litus eiectus esset, &  
Geometrica quædam schemata conspexisset, excla-  
mauisse ad comites fertur, Bene speremus, homi-  
num enim uestigia uideo, ac ciuitatem ingressus,  
ibiq; disputans, amplis muneribus est donatus.  
His autem disciplinis instructi ueteres cos in philo

sophia progressus fecerunt, quos nunc admiramur quidem, sed longo distantes intervallo nequaquam assequimur.

Ceterum nonnulli sunt, & quidem non ineruditi homines, qui mathematicas ea ratione vituperant, quod suppositionibus, ut aiunt, quibusdam utantur, quarum rationem reddere nequeant; ex his autem reliqua probent, quæ cum ex ignotis consequantur, ipsa quoque ignota esse necesse est.

Hac ipsi ratione mathematicas damnant, & choro scientiarum excludunt; quodque maius videtur suorum dictorum Platonem testem producunt, qui in septimo de Rep. inquit. Geometria, eiusque comites circa ipsam essentiam quodammodo somniant; sincere autem quicquam cernere non possunt, tantisper dum suppositionibus hærent, easque ratas, & immobiles adeo servant, ut illarum rationem reddere nequeant: nam ubi principium quidem ponitur id, quod est ignotum, finis autem & media ex ignoto deducta mutuo connectuntur, collectam inde assertionem quoniam pacto scientiâ vocemus? Nos igitur ab instituto nostro non alienum existimamus, ijs quam brevissime respondere, eosque ab hac sententia, si per nos fieri possit, deducere.

Illud autem primum ad memoriam reuocabimus, Platonem ipsum mathematicam disciplinam ea vi, ac natura esse, ut animum purget, & instituat, aperte pronuntiare, quippe quæ caliginem auferat a diuino illo mentis nostræ lumine, quod magis



quàm decies mille corporei oculi, iuxta Homericam Palladem, seruandum est; ipsamque passim scientiam appellare; maximamque his, qui eam adipiscuntur, felicitatis causam asserere. sed quid nam is philosophus sibi uelit in septimo de Rep. cū ab ipsa scientiæ nomen aufert, iam dicemus. scientiam Plato uniuersalem omnem cognitionem frequenter appellat, a sensu, qui singularia cognoscit, ipsam distinguens: quo sanc modo, & in ciuili, & in sophista scientiæ nomine usus uidetur; ipsam etiam sophisticen scientiam generosam appellans, quam Socrates in Gorgia peritiam quandam esse dixit: quinetiam ipsam adulatricem aliasque peritias, quæ uerè scientiæ non sunt, scientiæ nomine nuncupauit. Hanc autem uniuersalem cognitionem in eam distinguens, quæ causas contemplatur, & eam quæ res sine causis cognoscit, illam quidem scientiam appellandam censet, alteram uero peritiam, itaq; artibus quidem scientiæ nomen tribuit, peritijs uero nequaquam. Quomodo enim, inquit ipse in conuiuio, ratione carens cognitio erit scientia? omnis itaq; cognitio rationem habens, & causas contemplans scientia est. Quam quidem scientiam a peritia distinctam ex rebus subiectis diuidit, alia enim in opus prodit, et in rebus singulis exercetur, alia uero contemplatur ea, quæ per se rebus insunt, & semper eodem modo se habent; atq; illam quidem appellat artem, hanc uero scientiam. Rursus uero scientiam hanc ab ar-

te seiunctam partitur, aliam enim absque suppositionibus esse decernit, aliam uero suppositionibus inniti; atque illam quidem uniuerse omnia contemplari, donec ad bonum ipsum, supremamque omnium causam ascendat, quem suæ perscrutationis finem constituit; quæ autem suppositionibus utitur, certa quædam principia statuit, atque ex his probat quæ sequuntur omnia, non ad principium sed ad finem tendens. Itaq; mathematicen, quod suppositionibus utatur, perfectæ illa supremæq; scientia, quæ nullis suppositionibus est innixa, inferiorem esse pronuntiat; non quod propria ignoret principia, sed quod ea sine demonstratione ab illa sumens ex his reliqua demonstret. Mathematicæ igitur, ex Platonis sententia, suprema quidem sapientia inferior est, & si cum ea conferatur, imperfecta, scientia nihilominus est, quoniam æterna contemplatur, & eorum quæ cognoscit rationes habet & causas. Quamobrem nihil impedit Platonis sententia, quæ nobis obstare uidebatur, quin mathematicas disciplinas uti studio dignissimas amplectamur.


Nonnulli etiam sunt, qui has disciplinas alia ratione despiciunt; quod scilicet in humili, et ignobili materia uersentur. cum enim scientiæ, inquirunt, ex rebus subiectis suam dignitatem sumant, quemadmodum illæ, quæ res præclaras, & eximias tractant, præstantissimæ sunt, ut prima philosophia, & scientia de anima, ita illas, quæ res

tractant humiles, & abiectas, ignobiles esse neces-  
se est. sed quantitatem, in qua uersantur mathe-  
maticæ, rem esse dicunt ignobilissimam, esse enim  
accidens, primæ materiæ coniunctissimum, quod  
nullam eius præparationem requirit, nullam ad  
agendum uim habet: quamobrem ex eorum senten-  
tia mathematicas ignobilissimas esse consequitur.  
Verum ijs nos respondentes illud primum dicemus,  
mathematicas, quauis præstantissimis illis scien-  
tijs longe inferiores uideantur, esse tamen illis ad  
humanæ uitæ usum magis expetendas: non enim  
si quid melius est, id necesse est etiam magis expe-  
tendum esse: philosophari enim, ut Aristoteles ait,  
melius est quàm lucrum facere, attamen ei, cui res  
ad uiuendum necessariæ non suppetunt, non magis  
expetendum est. sunt autem mathematicæ propte-  
rea magis expetendæ, quòd ad usum humanæ uitæ  
sunt magis necessariae; ut ex his, quæ ante dicta  
sunt, perspicuum esse potest. fere autem ita eue-  
nit, ut necessaria magis expetenda sint, non ne-  
cessaria meliora. Illud deinde attendendum est,  
non tantum ex rei subiectæ dignitate, quam isti  
solam spectasse mihi uidentur, sed ex præstantia  
quoq; demonstrationum scientiarum nobilitatem  
sumi: illa enim, quæ exquisitius demonstrat, nobi-  
lior censetur, atq; præstantior: cum autem ma-  
thematicæ disciplinæ exquisitissime demonstrent,  
ipsas hac quidem ratione doctrinis omnibus præ-  
stare dubitandum non est. Verum cum duæ scien-

tiæ ita differunt, ut altera exquisitius demon-  
stret, altera de rebus præstantioribus agat, iure  
dubitari potest, utra præstantior existimanda sit.  
illa quidem præstare nobis uidetur, quæ exquisi-  
tius demonstrat; quoniam scilicet demonstratio  
formæ rationem habet, res autem subiecta mate-  
riæ, demonstratio enim præbet esse rei, quæ scitur,  
ea ratione qua scitur; atq; ita se habet in scientia,  
ut figura in statua, in oratione compositio, & in  
homine anima: quod si demonstratio quidem for-  
mæ, res uero subiecta materiæ rationem habet,  
scientiam quæ magis exquisitè demonstrat, ea quæ  
de rebus melioribus agit, præstantiorem esse con-  
sequitur. nam & formam materia meliorem esse,  
& quod re meliori antecellit, præstantius esse  
constat. idq; ex eo confirmari potest, quod & sta-  
tuarius præstantior existimatur, qui formosam  
statuam facit ex ære, quam qui deformem ex au-  
ro; & poeta præstantior, qui humilia canit egre-  
gie, quam qui grandia uulgariter. Quod si hæc  
ita se habent, mathematicæ disciplinæ, quæ tam  
exquisite demonstrant, ut in omni ætate, & apud  
omnes gentes, eandem habeant firmitatem,  
atque constantiam, alijs doctrinis, in quibus tam  
uariæ sunt, tamque inter se discrepantes senten-  
tiæ, ut nihil in ipsis stabile, aut firmum esse ui-  
deatur, longe præstabunt. præsertim cum earum  
usus amplissimus sit, & maximus. Quamobrem  
non est, quod eorum uerbis commoueamur, qui

*mathematicas ut ignobiles , & abiectas despi-  
ciunt, cum omnium potius disciplinarum nobi-  
lissimæ , præstantissimæque non immerito dici  
possint .*

F I N I S .







LECTORI  
IOSEPHVS VAL-  
DANIVS.



VAE me rationes impulerint, Lector optime, ut has praefationes meas in lucem exire permitterim, ne quispiam forte existimet, id me inani ambitione commotum fecisse, hic breuibus exponendum duxi. Duabus me in hanc sententiam rationibus adductum scito; altera, ut Brixianam Academiam, in qua nunc uersor, & in qua exornanda atque illustranda tot nobilissima ingenia certatim contendunt, ego quoque, si possem, aliqua ex parte ornarem: altera, ut studiosae iuuentuti ostenderem, quem ex moralis philosophiae, quem ex Logices, & quem ex mathematices studio consequi fructum possent: itaque illos ad haec honestissima studia excolenda cohortarer: optima enim ad disciplinas capeffendas illa mihi uidetur esse cohortatio, qua earum usus, atque utilitas demonstratur. Has autem praefationes nunc quidem solas, tanquam statuarum capita a suis

corporibus auulsa, emittimus; sed si eas studiosis non ingratas esse cognoscemus, corpora etiam, quorum hæc sunt capita, in lucem proferemus. Euclidis uidelicet elementa, in quibus mathematicæ disciplinæ traduntur, a nobis conuersa, & explicata: nostrasque in Aristotelis topica explanationes: quæ iamdudum, me insciente, in Academia Veneta typis excusæ, sed corruptæ admodum atq; imperfectæ, ut ab aliquo ex nostris auditoribus fuerant exceptæ, sine auctoris nomine diuulgatæ sunt: & in Aristotelis libros de moribus ad Nicomachum, quos nunc in hac nobilissima Academia interpretamur, compendiarias explicationes; aliasque nonnullas non inutiles, ut opinor, commentationes. Has igitur prefationes; candide lector, ueluti flores quosdam nunc accipe, ac paulopost fructum aliquem, modo Deus optimus maximus consilijs nostris faueat, expectato. Vale.

Brixie Kalendis Februarij. M. D. LXVII.

58 102  
A N D R E A E M V T I I  
C I V I S B R I X .



DE Logica libri ratione, & moribus olim  
Quos dedit in lucem magnus Aristoteles,  
Queque mathematicis de rebus prodidit auctor  
Euclides acri præditus ingenio,  
Quid prosint, mira monstrat Valdanius arte,  
Ad studium & tardos dum studet allicere.  
Postea ut obscuris horum dare lumina carthis  
Optata approperet, fata secunda sinant;  
Ut uere possit se dicere quisque beatum,  
Horum qui studijs applicet ingenium.

H 2

# ANALYSIS



The first part of the  
 work is devoted to the  
 description of the  
 various parts of the  
 human body, and the  
 manner in which they  
 are connected together.  
 The second part  
 contains a description  
 of the various  
 diseases of the  
 human body, and  
 the manner in which  
 they are cured.

AD LECTOREM  
HIERONYMI BORNATI  
ACAD. BRIX.



MORALIS *sophia*, et Logice quem præbeat usum,  
Quid profit lector certa Mathesis habes ;  
Ergo age *Valdanio* grates, qui magna libello  
Claudens, ingenij dat monumenta sui .

ADDUCTION

OF THE

OF THE

OF THE

OF THE